

Zunḡwire á wakita na a puwatertaa Paul ge emnde a KAURINTUS

Ga use á Paul

¹ Ba iya Paul, a eksisaa ba Dadaamiya áte waya á ervaunḡe-aara geni yá gevge slebela á Yaisu *Almasiihu, ḡá anḡkwa puwakurtá ba ḡere wakita na, ḡá antara egdza emmemiya Saus-tainais. ² ḡá anḡkwa gakur use á ḡere ge kure emnde á Dadaamiya am Kaurintus. Adaba ḡurna na a magakurnaa Yaisu Almasiihu, gakurevge emnde á Dadaamiya, a d'akurtaa ba ḡane geni kwá gevge cufedḡe antara emnde na tá yeka an zhera á Yaakadada Yaisu ma áme keni bademme, ba ḡane una Yaakadada ge itare, Yaakadada ge miya bademme na. ³ Tara Eddemiya Dadaamiya, tá antara Yaakadada Yaisu Almasiihu, a magarakurnaamaga ḡurna, a varakurtevá hairire.

*Sláfá we á Paul adaba názena a velanaa Dadaamiya á kyá erva an Yaisu *Almasiihu*

⁴ Ba kelaazare, yá yanka slafanaa we-aaruwa ge Dadaamiya adaba kure, adaba ḡurna na a magakurnaa ḡane á kyá erva an Yaisu *Almasiihu na. ⁵ Am ḡjá á kure kina gakurevge palle antara Yaisu Almasiihu, gakurevge emnde na ni hyakurevhye am duksa bademme áte unḡule-aara. Daaci kina wá, diyakurdiya jirire,

hyakurephye kwaraterse jirire nanna ge emnde umele keni bademme. ⁶ Labare á Yaisu Almasiihu njaanja am kure, adaba kwa lyiyanaa án ervaunđe á kure palle am sarte na njá anƙwa balakursebále na. ⁷ Adaba una nanna, baaka názu á ektsevuktse ázekure ge dába unjule á Dadaamiya, kwa emnde na ni kwá anƙwa ufa eptsá á Yaisu Almasiihu na. ⁸ Ba kelaazare, dete halavuwa á duniya, á de ndzedakurtaa ba nane, geni á de mbedakuraaka shairiya vaci sawa á Yaakadada Yaisu Almasiihu. ⁹ Dadaamiya a naba dákurte, geni kwá gevge palle an Egdza-aara Yaakadada á miya Yaisu Almasiihu. Názena ni a ndaasa nane na wá, bademme watse á de gevge, adaba Dadaamiya á eptseka elva-aara d'ekid'eki.

Dágala antara tegáva á emnde a fetarfe am Kaurintus

¹⁰ Egdzar mama-aha-aaruwa, názu yá yekaná iya ázekure an zhera á Yaakadada á miya Yaisu *Almasiihu wá, a tegevka dágáve á kure, bademme á kure njawinja á ba áte ye palle, jawammeje am enƙale palle, we á kure keni palle. ¹¹ Yá ndahaná adaba uwe una egdzar mama-aha-aaruwa, adaba ta se ndahiya emnde á Kaulauwe, una ba emnde á kure, geni anƙwa dágala-aha am dágave á kure. ¹² Náwa názena yá kátá bakurná iya: Labára anƙwa tegáva gergere am dágave á kure? Adaba ta bántsa emnde umele am kure: Itare tá daba ba iya Paul. A ba emnde umele: n'ere wá, njá daba Apaulaus. A ba emnde umele zlaɓe adaliye, n'ere keni njá daba ba Piyer. A ba emnde umele zlaɓe

ádaliye: ɲere wá, ɲá dɔba *Almasiihu. ¹³ Uwe? Kwá kurken Almasiihu an tega gergere kwakya emtu? Emtu kwa cenáncena wá, iya Paul ta zlejeliyaa áte dzaɲgala, ya emtsehe adaba kure emtu? Emtu ndza ta magakuraa baptisma na wá, an zhera-aaruwa iya Paul emtu? ¹⁴ Iya wá, yá slafaná we-aaruwa jipu ge Dadaamiya, adaba ndza maganakuránka baptisma ma ge ware á kure kení, má dedde ge tara Kirispus, tá an Gayus ɲjaiɲe-ka. ¹⁵ Daaci ware edda-aara ni, baira á de bá ya magakuraa baptisma an zhera-aaruwa na? ¹⁶ Ane, a viyarka una ndza ya magateraa baptisma ge tara Aitiyain, antara emnde-aara na kení. Am iga a una wá, diyanka máki ndza ya maganaamaga baptisma ge ura umele. ¹⁷ Yaisu Almasiihu belika geni yá se magaterá baptisma ge emnde, a beli ge se bálá elva-aara, labáre á higa ge emnde bademme, wallá yá wesháná an ilmu á duniya-ka, geni a ganveka emtsa á Yaisu áte dzaɲgala seke duksa ba dey.

Hákuma antara ilmu á Dadaamiya aɲkwa am elva á Yaisu

¹⁸ Áza emnde na tá an keɔa áte uɲɲule á Dadaamiya wá, má ká ndáhá elva a emtsa á Yaisu *Almasiihu áte dzaɲgala wá, tá zharák ba seke ká ndáhá elva a uksaɲwire, amá ázemiya mi emnde na má áte uɲɲule a jirire wá, aɲkwa hákuma á Dadaamiya am huɔe á elva ɲanna. ¹⁹ Adaba uwe, aɲkwa an puwa am wakita á Dadaamiya, a ba ɲane:

Emnde na tá an ilmu á duniya, yá de kedaternaakeda ilmu ñanna, yá de já eñkale á emnde na tá an diya jipu na.

²⁰ Daaci máki estuwa wá, emnde na tá an ilmu á duniya, áma edda á ilmu mázla-aara? Ma emnde na tá an diya kwakya am wakita, áma edda á diya kwasau? Antara emnde a gá jawe arge njá á zamane na, áma zhera-aatare? Dadaamiya ganvege ilmu á duniya názu baaka námpire-aara. ²¹ Dadaamiya a marateraa ilmu-aara ge emnde geni tá diyeddiye ñane, ganakini ba ñane una Dadaamiya á jirire, amá an ilmu á duniya, emnde diyarseka ñane ðekiddeki. Adaba una ñanna, Dadaamiya a eksetaa barama umele an elva na mí balaná miya kina, itare tá zharán ba seke elva a uksañwire na, amá Dadaamiya tsaatse áte elva-aara ñanna, geni á lyaterlya an ñane, emnde na tá fetaare áte ñane baðemme.

²² Yahudiya-aha itare tá aɲkwa ndava naláama, geni tá nanna duksa an ice-aatare emtsaade, lauktu tá fetarfe. Yunaniɲkau-aha maa, itare tá kátá dise Dadaamiya an ilmu á ire-aatare.

²³ Amá miya wá, mí bálá ba elva a Yaisu Almasiihu na ta zleɲelaa áte dzanɲala na. Ge Yahudiya-aha wá, waazu ñanna á jaterja an ervaunɲe. Am hyema á emnde na garevka Yahudiya-aha keni maa, tá cenán ba seke elva a uksañwire. ²⁴ Amá áza emnde na a dzeratersaa Dadaamiya geni tá gevge emnde-aara an jirire wá, ma Yahudiya-aha, ma emnde a jeba umele keni, elva ñanna gevka duksa dey, diyardiya geni ba jirire aɲkwa hákuma, antara ilmu á

Dadaamiya am Yaisu Almasiihu. ²⁵ Á ba emnde umele: Názena a maganaa Dadaamiya na wá, una ba uksañwire, mbate jauje ge ilmu-aatare. Itare tá slán ba seke baaka payda á Dadaamiya, mbate baakire á payda ñanna jauje ge ndzedá-aatare. ²⁶ Egdzar mama-aha-aaruwa, ba kure na a dahakuraa Dadaamiya ge slera-aara na keni, zharauzhára ba shagera; ge ilmu na ta tsaa átekwa emnde a duniya wá, ábi am kure cekwa emnde a ilmu ñanna? Ábi cekwa emnde a hákuma am kure? Cekwa emnde na tá an dárádza keni bademme. ²⁷ Amá ba emnde na ni emnde a duniya tá zharáter ba seke uksañwaha na wá, Dadaamiya a dzeraterse geni tá gev emnde-aara. An una ñanna, a fateraar zherwe jipu ge emnde na tá an ilmu á duniya. A dzerese emnde na baaka payda-aatare, geni á fateraar zherwe ge emnde a ndzedá. ²⁸ Dadaamiya a dzerese ba emnde na baaka dárádza-aatare am duniya, emnde tá zharáter ba seke ma ta baaka keni ba kalle na, geni á gatervege emnde na tá an dárádza na. ²⁹ Dadaamiya a dzerese jeba á emnde ñanna, geni ma ware keni a galeka ire á katafke-aara. ³⁰ Ba Dadaamiya una a gakurve palle antara Yaisu Almasiihu, ba ñane una a magaa puta, geni Yaisu Almasiihu á gev edda á ilmu á miya. Adaba barka á Yaisu Almasiihu ñanna zlaɓe ádaliye, Dadaamiya a eksamite ge ma emnde a jirire á katafke-aara, a lyamisehe, a gamive emnde-aara. ³¹ Adaba una ñanna, gevge ba seke una am wakita á Dadaamiya añkwa an puwa, a ba Dadaamiya: Má ura á kátá gálá ire wá, a eggálá adaba názena a maganaa

Yaakadada.

2

Paul á bálá elva a emtsa á Yaisu áte dzaŋgala

¹ Egdzar mama-aha-aaruwa, am duwa-aaruwa á dezekure ge ndakur názena a maraŋeraa Dadaamiya na wá, ba iya keni ndanakurka elva ŋanna an elva na zlazlada tá kátána emnde a duniya na, ndaanakurka an ilmu á duniya keni. ² Ba lauktu yá dezekure keni, ndza njanantenja ya geni yá de ndakur ba elva a Yaisu *Almasiihu, kwakya-aara ba elva a emtsa-aara, yá de farka umele defekideki. ³ Daaci am una ndza yá am dágave á kure keni, ndza ya tapaa ba baakire á payda am vuwa-aaruwa, ndza á wiwa lyawa jipu, yá ámbera gyaigya ba seke maagara. ⁴ Am sarte na yá aŋkwa á kwarakurse duksa áte elva á Dadaamiya na, belanakuremka ilmu á duniya, antara elva-aha na emtake am hyema na geni sey kwá lyevalya, amá a maganaa ba Shedekwe Cufedde slera-aara am kure, an hákuma á Dadaamiya, kwa naba diyeddiye geni elva-aha-aaruwa jirire. ⁵ Daaci estuwa, fetarfire á kure a gevka áte ilmu á emndimagwaha, amá a gevge áte slera á Dadaamiya, an hákuma-aara.

Ilmu na á vatertá Dadaamiya ge emnde

⁶ Ge jirire wá, ge emnde na gyairebgye am elva á Dadaamiya wá, yá aŋkwa kwaraterse ilmu á jirire, amá wá, ilmu á urimagweka, ilmu á male-aha na tá an hákuma am duniya, watse tá de zle na ka. ⁷ Ilmu na ni yá aŋkwa ndahaná iya na wá, ilmu á Dadaamiya. Una ndza ba nasherire

á Dadaamiya, ndza diyarka emndu werre. Amá wá, kwaye zlaɓe am fakta á duksa bademme, kertenj ndza an tsatse ázenjara geni watse mí de njá antara njane am demdemire-aara na á maga wulwulire jipu na. ⁸ Ba palle keni baaka ura am male-aha á duniya na una diyaadiya jeba á ilmu njanna. Ma andze diyardiya wá, ma andze tá jeka Yaakadada áte dzangala. Adaba ba njane una edda á demdemire njanna wulwule jipu na. ⁹ Dadaamiya a magaa ba seke una anjwa an puwa am wakita-aara, a ba njane:

Názena zlaɓe nánka ice á urimagwe, názu zlaɓe cenánka hyema á urimagwe, názena slaslaaka urimagwe dekideki na, Dadaamiya a tsatsateraa una njanna ge emnde-aara na wayarwáya na.

¹⁰ Amá ge miya wá, Dadaamiya a maramiyaa nasherire á duksa-aha njanna á ba an Shedekwe Cufedfe, adaba Shedekwe Cufedfe diyaadiya duksa bademme, antara ba názu á slaslaná Dadaamiya keni bademme. ¹¹ Ba emndimagwaha keni wá, anjwa ura ni á dzegwándzegwa dise názu am huɗe á ura emtu, má edda á vuwa-ka? Ba duksa palle an Dadaamiya keni, sey ba Shedekwe á Dadaamiya palle una diyaadiya názu am Dadaamiya. ¹² Amá miya wá, Dadaamiya a naba vamite Shedekwe-aara njanna diyaadiya názu am njane na, Shedekwe umeleka. Dadaamiya a vamite Shedekwe-aara geni á melamiyumele ge cena názena á vamita njane. ¹³ Daaci má njá anjwa á kwaratersa elva ge emnde áte jeba á elva-aha njanna wá, njá kwaratersa an ilmu na ta mbanjersa emndimagwahaka, á

banjerna ba Shedekwe Cufedde nanna anƙwa am erwaunƙe-aatare keni na. ¹⁴ Edda una má baaka Shedekwe Cufedde am erwaunƙe-aara wá, á dzegwánka lyiya jirire na á baterná Shedekwe á Dadaamiya ge emnde. Ba eccena-aara keni á cenánka. Baira am hyema-aara, njane á cenán ba seke elva ucire, adaba sey ba emnde na tá an Shedekwe á Dadaamiya una tá cenánƙe duksa-aha nanna. ¹⁵ Edda una anƙwa Shedekwe Cufedde am njane, á diyed-diye duksa bademme, tara una jirire, antara una mándzawe keni bademme, amá edda una baaka Shedekwe Cufedde am njane wá, á taa diseka názu am edda una an Shedekwe Cufedde na. ¹⁶ Anƙwa an puwa am wakita á Dadaamiya, a ba njane: Ware edda una diyaadiya názu á slaslaná Yaakadada a bina. Amá miya na má an Shedekwe á Dadaamiya na wá, diyamidiya názu á slaná Yaisu *Almasiihu.

3

Njere na ba emnde a slera á Dadaamiya

¹ Egdzar mama-aha-aaruwa, ge jirire wá, am duwa-aaruwa na ya dezekure na wá, ndza dzegwanánka ndakur elva áte una tá ndahater ge emnde na anƙwa Shedekwe á Dadaamiya am itare na. Ndza ya bakuraa elva ba seke una tá ndaater ge emnde na ni zlaƙe tegaraaveka antara emnde a duniya dƙeƙeƙe na, adaba ndza kwa ba seke egdzara mesheshe, zlaƙe kwá fantau an fe ge daba Yaisu *Almasiihu. ² Názu ndza ya kwarakursaa iya, ndza ba seke uƙa na tá fanu ge egdzere anwaslire, ndza vanakurteka dafa á

jirire, adaba ndza zlaɓe kwá dzegwánka ezzaara. Sem ba kina keni ba zlaɓe kwá dzegwánka ɲanna. ³ Adaba zlaɓe njá á kure geraraaveka antara njá á emnde a duniya. Kwakya shelha, antara dágala-aha am dágave á kure. An jeba á hala á kure ɲanna, kwa ba seke emnde a duniya-ka emtu? Una ba jirire, kwa ba kalkale antara itare. ⁴ Am ta bántsa emnde umele am kure: itare ta dɓaba iya Paul, a ba emnde umele, itare tá dɓaba Apaulus, an jeba á mága á kure ɲanna, kwa ba kalkale-ka antara emnde umele am duniya emtu?

⁵ Ware Apaulus keni? Iya Paul, ya hyeb ware kena? Bukerɗe á ɲere ɲa ba emnde a slera á Dadaamiya, a beláɲeraa á sem dágave á kure ge fakurá áte barama á Yaisu *Almasiihu, geni kwá gevge emnde a fetarfe. Ma ware á ɲere keni á maga ba slera na a faara Dadaamiya na. ⁶ ɲere, ndza ɲa ba seke emnde a herɗa. Iya, ya dzeɓaa duksa, Apaulus maa, a fanu yáwe, amá á walantá ba Dadaamiya palle duksa ɲanna. ⁷ Daaci ma slejeba duksa, ma slefanu yáwe keni hyarebka duksa, sey ba Dadaamiya palle una átire, adaba á walantá ba ɲane duksa na an dzeɓa. ⁸ Edda una a dzeɓaa duksa, an slefanu yawe, ta ba kalkale. Dadaamiya á de vaterte ba laɗa-aatare ma ge ware-aatare keni áte názena ndza a maganaa edda-aara. ⁹ ɲere njá maganá ba slera ge Dadaamiya, slera á ɲere ba darame palle. Kure keni maa, kwa ba seke fahe á Dadaamiya, zlaɓe adaliye, kwa ba seke bere na a fanaa Dadaamiya.

¹⁰ Iya wá, Dadaamiya a magiyaa ɲgurna

kwakya ge fantau ge slera-aara am dágave á kure. Ndza ya ba seke slefa haha na diyaadiya fa haha ba shagera na, ya fanaa ekte shagera ge bere, daaci emnde umele keni tá de katafke an slera ge ndera bere átekwa. Daaci bademme á emnde a ndera bere ñanna, ma ware-aatare keni a maga enjkale ba shagera áte slera na á maganá ñane ge ndera bere ñanna. ¹¹ Ekte á bere wá, an fa zlauzle, ba ñane una Yaisu *Almasiihu, tá taa farka ekte á bere umele ge ñane d'ekid'eki. ¹² Ate ekte á bere ñanna, emnde umele tá de nderanu an dindar, emnde umele tá de nderanu názá-aatare an lipela, emnde umele tá de nderanu an nákwa na an dárádza jipu na. Emnde umele zlađe ádaliye, ma tá de nderanu názá-aatare an hazla, antara názambakará, emnde umele ma tá de maganu an kwatsape. ¹³ Vaci tsa fáyá, ma slera á ware keni á de shebaaveka mázla-aara. Adaba vacite ñanna wá, Dadaamiya á de maresemáre ma slera á ware keni, á de fanu slera-aha ñanna ge kára emtsaade. Daaci mí de zhara gergerire á slera-aha á miya bademme tara una shagerire, antara una shagerkire keni. ¹⁴ Edda una má kára zaaka tate na ndza a maganaa ñane wá, Dadaamiya á de vante lada-aara. ¹⁵ Amá edda una má kára zawza tate na ndza a nderanaa ñane, ñane wá, kedanaakeda lada-aara, shifa-aara wá, á de shansha, amá wá, á de enjla ba zlahhe á sa am huđe á kára.

¹⁶ Diyakurka geni kure wá, kwa ba seke bere á Dadaamiya, á njá Shedekwe á Dadaamiya am kure emtu? ¹⁷ Ay degiya, ma a kyabanaa ware bere á Dadaamiya ñanna, Dadaamiya á

de kefenaakeda edda-aara keni. Afaba bere ṅanna, bere cudedde ge Dadaamiya. Daaci ba kure una kwa bere á Dadaamiya ṅanna.

¹⁸ A darka shaitaine ge ura umele am kure, a de sláná am ervaunde-aara geni ṅane gevge edda á ilmu am duniya na. Arge una ṅanna, a ganvege ire-aara ba seke edda una cekwa enkale-aara am ice á emnde, daaci á de shá ilmu á jirire. ¹⁹ Ya ndaanaa afaba uwe una, ilmu na ta disaa emnde a duniya, una ba ucire am ice á Dadaamiya. Ankwa an puwa am wakita á Dadaamiya, a ba ṅane: Á shatertuwa ba Dadaamiya ge emnde a ilmu, am yaimyaimire na tá maganá itare. ²⁰ Ankwa an puwa á ba am wakita á Dadaamiya ṅanna zlaḅe ádaliye, a ba ṅane: Nazu tá sláná emnde a ilmu á duniya wá, baaka nampire-aara áza Yaakadada. ²¹ Afaba una ṅanna, ma ware edda-aara keni a galeka ire áte ura umele ba dey. Diyaweddiye geni bademme á duksa á ba ázekure. ²² Ma iya Paul, ma Apaulaus, ma Silas, bademme á ṅere ṅá á ba am erva á kure. Ma shifa, ma emtsa, duksa na ankwa kina, antara una á de sawa á katafke, bademme ba náza á kure. ²³ Amá kure an ire á kure wá, kwa emnde á Yaisu *Almasiihu, Almasiihu keni ṅane názá á Dadaamiya.

4

Elva a slera á emnde a bela

¹ Daaci estuwa, diyaweddiye ba shagera geni ṅere emnde a bela á Yaisu *Almasiihu wá, ṅa ba emnde a slera-aara, Dadaamiya a faṅerar de sateranse nazu ndza diyarka am elva-aara ge

emnde. ² Diyakurdiya geni názu á kataná zánwe áza sleslera-aara wá, ba dzayyire á ervaunđe áte slera na a faara ñane. ³ Ázerwa ge iya wá, baaka lámbe-aaruwa áte názena kwa sliva kure, ma emndimagwaha tá nderita elva-ara ge dise dzayyire á ervaunđe-aaruwa keni, iya baaka lámbe-aaruwa átekwa. Ba iya an ire-aaruwa keni njananteka ya am ervaunđe-aaruwa geni dzayye ervaunđe-aaruwa. ⁴ Diyanka ñekideki, má sem ba kina keni kwasau ba zlafe anƙwa duksa mándzawe am ervaunđe-aaruwa. Amá yá taa bánka ganakini ya cudedde bademme. Sey á de kyáná ba Yaakadada palle shairiya-aaruwa. ⁵ Adaba una ñanna, hadzalauka am elva ñekideki geni kwá njanta kure názu am huđe á ura. Amá ufaufa ba náza á Yaakadada Yaisu *Almasiihu palle. Vacite na má de samsa ñane, bademme á názena an shebe kina, antara názena am huđe á emnde, bademme á de sansese. Daaci ma ware keni á de galaná ba Dadaamiya adaba slera-aara, ma ndza a magaa kwakya, ma ndza a magaa ba cekwaanƙuɗi keni.

⁶ Ya ndaase elva-aha ñanna estuwa áte ire á ñere antara Apaulaus na wá, ba geni kure keni kwá zharaná áte ñere názena á kátá ndahana elva ñanna. Názena yá kataná iya ázekure wá, ma am uwe keni ñabaudába á ba áte una am wakita á Dadaamiya, geni ma ware á kure keni a galeka ire áte ura mázle-aara, a epsaweka ura umele keni. ⁷ A gakvaa ware male arge emnde? Ábi bademme á názena ka shanaa ka a vaktaa ba Dadaamiya? Ay labára kena ká gálá ire átekwa ba seke ka ganaa ba ekka an ndzedfa á ña na?

⁸ Ekkure, kerten njakurantenja am ervaunde á kure geni shakuransha názena kwa katanaa kure bademme, an emtsa waya á kure, gakurevge slekse-aha an ire á kure. Amá ñere wá, estuweka. Wayanwáya geni kwá gevge slekse-aha ba jirire am ice á Dadaamiya, lauktu watse mí de njá átirpalle antara kure am yaikkire-aara. ⁹ Ñere emnde a belá á Yaisu *Almasiihu wá, yá zharán ba seke Dadaamiya a daneraa á dem kataliya á emnde ba cakcake, ña ba seke emnde na ñáteraanja shairiya a emtsa, tá de ceba shifa-aatare áte ice á zlamáha na áza emnde. Am duniya bademme ganjerevge ba seke názá ezzhara, tá ámbera eddzaka na, antara ba malika-aha keni tá zhara ba ñere. ¹⁰ Ñere ganjerevge ba seke uksanwa-aha áza emnde adaba zhera á Yaisu Almasiihu, amá kure wá, kwa bántsa kure, kwa emnde a enkale adaba kwa náza-aha-aara. Ñere ña emnde na baaka payde á ñere, amá kure wá, kwa emnde a ndzedá, kwa emnde a dárádza, ñere, ña emnde na baaka demdemire á ñere. ¹¹ Se ba am kina keni á cebanjerá ba lámbe, á wánerá ba waya antara ndera, náza tsekwa á ñere keni baaka, baaka há á ñere keni ge ñere. ¹² Njá maga mbera á ñere geni ñá shansha ba názu ñá zuze ge we á ñere. Má tá zlazlanjerzläze emnde, ñere ñá gater barka, ma tá fá ba zladá-ara áte ñere keni ba ñá fá ervaunde. ¹³ Má emnde tá za vuwa á ñere, ñere ñá eptsaterá an elva lailaidde. Ñere ganjerevge ba seke dugje áza emnde, se ba am kina keni tá zharáner ba seke názu tá de puwanve áte dugje.

¹⁴ Ya puwakurte una ge gula higa á kure an ñane ka, amá yá vakurte ba sawari-aha-aaruwa, adaba wayanakurwáyá an ervaunđe-aaruwa palle. ¹⁵ Ma kwa shaa ba emnde debu ge kwarakurse elva á Yaisu *Almasiihu keni wá, edda una gevge ba seke eddekure am emnde ñanna wá, sey ba palle. Eddekure ñanna ba iya. Adaba ndza ya dakurnaa ba iya zunñwe elva á Dadaamiya. ¹⁶ Daaci, táslawa á kure, gawevge ba seke iya. ¹⁷ Adaba una ñanna kina yá bela Timaute ádezekure, á de yehakuranteyeha ñane njá-aaruwa am elva á Yaisu Almasiihu. Názena á de kwarakursa ñane ba palle antara una yá anƙwa maganá iya am dágave á emnde a fetarfe ma áme keni bademme. Adaba ñane gevge ba seke egdza-aaruwa, slewaya-aaruwa, dzayye ervaunđe-aara áte elva á Yaakadada.

¹⁸ Kwakya emnde tá gálá ire am dágave á kure, itare ta kurken watse yá duka ádezekure ba dekideki. ¹⁹ Amá má wayetewáyá Dadaamiya wá, yá anƙwa duwa ba herzhe na. Daaci yá de nanna názena ta maganaa itare emnde a gálá ire ñanna, baaka wedere-aaruwa áte názena ta ndahanaa itare, nampire wá, ba názu ta maganaa itare. ²⁰ Ya ndahanaa adaba uwe una, adaba Dadaamiya á ganveka sleksire-aara adaba nara á urimagwe, sey má anƙwa hákuma-aara am edda-aara. ²¹ Kwá kátá uwe kure kina ázerwa? Kwá kátá yá duwa an kurpe am erva emtu? Yá duwa an hairire, antara háyáva-he?

Shairiya á emnde a mága gwardzire

¹ Ma áme keni yá cena tá ndaha ba elva á kure geni kwa emnde a mága gwardzire, ba emnde na dábarka Dadaamiya keni tá manka jeba á una nanna. Adaba yá cena ankwá ura am dágave á kure á zlava an mukse á eddenara.

² Kelaa ma kwá kyuwa adaba haypa na jesarje am dágave á kure, amá kure kwá gálá ire zabe adaliye. Naba ngyawansengye edda una a magaa laakire nanna am dágave á kure.

³ Iya wá, baaka irice-aaruwa am dágave á kure, amá am ervaunde-aaruwa wá, yá á ba am dágave á kure. Yá bakurá ba jirire: Edda una a magaa duksa estuwa am dágave á kure na, ba kalkale irice-aaruwa keni ankwá am dágave á kure, áte náza-aaruwa wá, belanarbelá ya shairiya ge edda-aara zlauzle.

⁴ Ya belaar shairiya nanna an zhera á Yaakadada Yaisu *Almasiihu. Náwa názu yá bakurná iya: naba jawammeje am dágave á kure, una ba jirire geni am ervaunde-aaruwa iya keni yá á ba am dagave á kure, hákuma á Yaakadada Yaisu *Almasiihu ankwá am dagave á kure.

⁵ Daaci ura estuwa, naba yawanánya ge Shaitaine geni a kedekeda vuwa-aara, amá á de shá shifa vacite na má watse Yaakadada Yaisu Almasiihu á se kyá shairiya á emnde bademme na.

⁶ Aley ni kure kwá gálá ba ire na wá, ábi una unjule-aara-ka. Emtu diyakurka ganakini egdza shahi á makala ba cekwaangudi á naba tsantetse ukpa na an wáslá na bademme emtu? Amaana: Egdza haypa ba cekwaangudi, á naba hyemhya am kure bademme.

⁷ Daaci sawansese emgyegwe

a haypa na ba seke shahi á makala na am dágave á kure, daaci kwá gevge emnde cufedfde duksa á kure. Diyandiya tsa geni Dadaamiya a gakurve vatene-ka emnde cufedfde, adaba Yaisu Almasiihu emtsamtsa adaba miya, nane gevge ba seke zhel kyawe na tá icaná am muñri á *Paska na ge miya. ⁸ Daaci zaumiza muñri á Paska á miya, amá wá, baaka shahi á makala am hufe-aara. Amaana: magaumika emgyegwe a haypa na ba seke shahi á makala na, amá njauminja cufedfde, magaumimága jirire.

⁹ Am wakita na ndza ya puwakurte zuññwe keni, ndza ya bakuránba geni njauka an emnde a mága gwardzire. ¹⁰ Dzamanka iya áte emnde a mága gwardzire na ta baaka am elva á Yaisu *Almasiihu, bi emnde a fá ice am duksa á ura, bi neyle-aha, bi emnde a mága hele. Ndanka ya áte emnde a duniya bademme, adaba ká taa piyeteka una, sey má ká njeka am duniya ba defideki. ¹¹ Elva-aaruwa ge iya wá, edda una ni ankwá á daba Yaisu Almasiihu, mele zlafe adaliye ni á de maga gwardzire, bi á maga wáya á duksa á ura an ervañfde-aara bademme, bi á de maga hele, bi á pesha emnde an zláze, bi á gev slembazla, bi á ila duksa á emnde na wá, ura estuwa njauka kerde, baira ba ge zá duksa keni fauka erva á kure á dem tasa palle antara nane. ¹² Shairiya á emnde na fartarka áte Yaisu Almasiihu wá, una slera-aaruka, banakuránka una nanna. Ay emnde na tá am kure keni kwá kyeka shairiya-aatare emtu? ¹³ Náza emnde na fartareka áte Yaisu Almasiihu wá, á de kyaná ba Dadaamiya an ire-aara shairiya-aatare. Ekkure

wá, magaumága ba una am dágave á kure áte una a ndaasa wakita á Dadaamiya, a ba ñane: Bakausebáke slemaga duksa mándzawe am dágave á kure na.

6

Dawánka shairiya á kure á deza emnde a duniya

¹ A ba iya wá: má tsekwaatsekwa dagala am dágave á kure, kelaa ma kwá dándá á deza emnde á Dadaamiya ni, kure kwá de puwa uje áza emnde na fartarka áte Yaisu *Almasiihu ðekideki na wá, una ni ba shagera? ² Diyakurka ganakini ankwá á sawa sarte umele, watse tá de kyáná ba emnde á Dadaamiya shairiya á emnde a duniya na bademme emtu? Má watse kwá de kyáná kure shairiya á nalgaadama ni, kwá dzegwánka ba egdza shairiya cekwaangudí emtu? ³ Diyaweddiye una ba shagera: am sarte ñanna, ba malika-aha á Dadaamiya keni watse mí de kyáná ba miya shairiya-aatare. Máki estuwa, labára mi kyeka shairiya á miya á ba am zamane á miya na keni? ⁴ Daaci má jerje lámare á duniya am dágave á kure wá, kwá dándá elva ñanna á deza emnde a duniya na baaka slera-aatare ðekideki am aiklaisiya na, geni tá de kyáná itare shairiya á kure emtu? ⁵ Jeba á una wá, zherwe jipu. Há! Ba palle keni baaka slenkwale am dágave á kure geni á tsanaatse elva am dágave á emnde a fetarfe emtu? ⁶ Kwa emnde a fetarfe ni kwá de puwar uje ge ire á kure áza emnde na fartarka áte

Yaisu Almasiihu, una ni ba shagera? ⁷ Ge jirire wá, anƙwa haypa á kure bademme, ma kwá de puwa ugje ɲanna á ba áza emnde á Dadaamiya keni. Una ɲanna á mára ba tsaftasfire á kure áte barama á Dadaamiya. Ma ura a magakte kelaadire, ma a ilu duksa á ɲa keni, shagera ba farvaunƙe, arge dá ura á dem shairiya. ⁸ Baira ɗeme, kure keni kwá maga ba kelaadire ɲanna tsa am ekte ge emnde umele, kwá anƙwa zlerma duksa-aatare ma gakurevge ba egdzar mama-aha am elva a Yaisu Almasiihu keni. ⁹ Diyakurka geni bademme á emnde a mága kelaadire tá taa demka á dem zlanna á Dadaamiya emtu? Jawanaaveka ge unɲule a jirire: Emnde a mága dákarire, emnde a kyula hele, emnde a mága gwardzire, an emnde na tá zlava an zála ba seke itare ákurá mukse, ¹⁰ zlaɓe ádaliye neyle-aha, antara emnde a fá ice am duksa á ura, emnde a mbazla, emnde a pesha ura an zláze, ira emnde a za baráma, bademme á kelaade-aha ɲanna, itare tá shánka zlanna á Dadaamiya. ¹¹ Emnde umele á kure, njá-aatare ndza ba estuwa werre. Amá kina wá, aɗaba zhera á Yaakadada Yaisu *Almasiihu wá, kwá an bara áza Dadaamiya, a gakurve emnde-aara, a gakurve emnde cuɗeɗe an hákuma á Sheɗekwe-aara.

Dadaamiya nderaaka urimagwe ge mága dakarire an vuwa-aara

¹² Ta bántsa emnde umele á kure: ma mága jeba-ara keni piyaaka, duksa bademme gevge ba halál. Una ba estuwa, amá wá, duksa bademmeka una watse emtake áte itare. Iya

keni yá slaslán ba estuwa geni ma mága jeba-ara keni piyaaka, duksa bademme gevge ba halál ge iya, amá wá, yá eksarka ðekideki gev náve á duksa umele. ¹³ Kwa bántsa kure zlafe ádaliye: náza za wá, ba ge zana á dem huðe, huðe keni ba ge za náza za á demkwa. Una keni ba jire ba estuwa. Ay degiya, vacite umele, tara huðe antara náza za ñanna bademme tá de keða bademme. Ay vuwa á urimagwe keni Dadaamiya a nderán ge mága dakarire an ñane emtu? A'aa estuweka, Dadaamiya a nderami ba ge Yaakadada Yaisu *Almasiihu, Yaakadada keni ge vuwa á urimagwe, aɗaba á ñámiya ba ñane. ¹⁴ Dadaamiya wá, tsantetse Yaakadada Yaisu am faya, á de tsamitetse miya keni an vuwa á miya bademme an hákuma-aara.

¹⁵ Diyakurka ganakini vuwa á kure ubiya á Yaisu Almasiihu emtu? Mi dzegwándzegwa tevaa ubiya á Yaisu Almasiihu, mi de jaterme an vuwa á záware emtu? Una á taa gevka dámmaru. ¹⁶ Diyaweddiye ba shagera ganakini má edda-aara a demaa am mukse záware, garevge ba vuwa palle antara ñane. Una wá, a ndaana wakita á Dadaamiya, a ba ñane: Emnde buwa ñanna, tá gev ba vuwa palle. ¹⁷ Ba duksa palle ge edda una a vante erwaunde-aara ge Yaakadada keni, ñane, tá an Yaakadada, tá gev ba palle am shifa-aatare.

¹⁸ Aɗaba una ñanna, camarauka tate á gwardzire ðekideki. Nja á haypa na á maganá urimagwe na, bademme á taa gevka palle antara vuwa á edda-aara, amá edda una a de magaa gwardzire wá, a maganta ba ñane kelaadire ge

ire-aara. ¹⁹ Diyakurka geni vuwa á kure bere á Shedekwe Cudedfde emtu? Shedekwe Cudedfde na a vakurtaa Dadaamiya na á njá am kure. Kwá kwaraná kure-ka vuwa á kure. ²⁰ Dadaamiya a varakurse an duksa na jauje ge ndzedá á urimagwe. Adaba una nanna, an vuwa á kure bademme, magaumága ba názena ni kwá zleba ba Dadaamiya palle an nane.

7

Elva áte nika

¹ Nawmbare jawápa á ndáva á kure, ndza kwa puwite áte nalmesheri á kure: Ate iya wá, máki zhele á camareka tate á mukse ba dekideki keni ba shagera. ² Amá adaba sabaaba á gwardzire wá, ambane ma ware keni á gá mukse palle, mukse keni á de gá zhele geni nane tá njá kerde. ³ Daaci sey zhele á vante wedere-aara ge mukse-aara, mukse keni á yanveka wedere-aara ge zhele-aara. ⁴ Adaba baaka hákuma á mukse arge vuwa-aara, á kwaraná zhele-aara. Ba estuwa ge zhele keni, baaka hákuma á zhele arge vuwa-aara, á kwaraná ba mukse-aara. ⁵ Daaci kure, tara zhele an mukse, piyawapteka dekideki am dagave á kure, sey má zlakuruzle am ndáhá geni kwá de njá gergere am sarte cekwaanḡudí, geni kwá yeka áza Dadaamiya. Am iga-aara wá, jawammeje zlafe adaliye geni a mbedakuraaka Shaitaine á dem haypa, adaba cekwire á farvaunḡe á kure.

⁶ Elva na yá anḡwa bakurná iya na wá, gevka laarire, yá kátá bakurá ba ni ma ura-ara keni ba shagera ba una a eksesaa edda-aara. ⁷ Ate iya

wá, yá kátá emnde bademme tá njá ba seke iya. Amá á taa gevka, adaba ma ware keni á ba an názena a wayanantaa Dadaamiya; ge ura umele á vante waya nika, ge umele á vante ndzedá ge nja an ire-aara ba ñane palle.

⁸ Kina wá, yá elvan ge emnde na zlahe gareka nika na, antara ñwasha na a kedaa zála-aha-aatare; itare wá, shagera tá njinja ba seke iya. ⁹ Amá má kwá taa kwaruka vuwa á kure wá, ambane kwá ñgudá nika. Ngulme ba una ñanna arge njá an mbagerire ba kelaazare.

¹⁰ Ge emnde na tá an nika zlauzle wá, una elva-aaruka, a fakuraara ba Yaakadada, geni mukse, a tegaraaveka dekideki an zhele-aara. ¹¹ Má gevge ni tegaraavetege an zhele-aara wá, sey á njá baaka zhele, bi á se mela antara zhele-aara. Ba estuwa ge zhele keni, a belanaaka mukse-aara dekideki.

¹² Náwa una wá, yá ndahater ge jugená á emnde umele: una Yaakadada-ka, yá baterná ba iya: máki anjwa zhele na fetarfe áte Yaisu *Almasiihu, an mukse na fetareka, a belanaaka mukse-aara. ¹³ Ba duksa palle ge mukse na fetarfe, máki á mba á zhele na fetareka, má zhel ñanna wayaawáyá an mukse-aara, a njinja am mba á zhele-aara. ¹⁴ Ya ndahanaa adaba una ka, adaba zhel ñanna zlahe fetareka na, ñane keni ba gevge cudede adaba mukse-aara. Mukse keni má zlahe fetareka, ñane keni ba gevge cudede adaba zhele-aara. Má baaka una wá, egdzara-aatare tá gevka cudede, amá estuweka, egdzara keni ta cudede-aha. ¹⁵ Amá má gevge ni edda una fetareka na á

kátá tegaava an slefetarfe wá, naba vawanteva baráma. Daaci una jauje na, ma mukse, ma zhele keni am iga á lámare ñanna, ñane gevge ba egdza zhele, adába Dadaamiya a dáhákur geni kwá njinja an hairire. ¹⁶ Ekka mukse, diyakdiya ba jirire ganakini ká de lyelya zhele á ña emtu? Ma ka zhele keni, diyakdiya ba jirire ganakini ká de lyelye mukse á ña emtu?

Ma ware keni a njinja á ba áte njá-aara na a dáhanaa Dadaamiya

¹⁷ Duksa palle wá, ma ware keni a edfaba barama á Dadaamiya áte una á maranná ñane, a tatayeka gev seke ura umele, a tsaatse á ba áte njá-aara ñanna ndza a dántaa Dadaamiya am kwa na. Kwaya ñane názena yá fateraare ya ge aiklaisiya-aha na ma tá áme keni bademme.

¹⁸ Má ura a shaa dāha á sawa áza Dadaamiya am sarte na an ñela am shedekwe, a eptseka elva, a tsaatse á ba áte nja-aara ñanna. Edda una a dántaa Dadaamiya am sarte na zlaɓe demka am shedekwe keni, a dzameka elva a dem shedekwe mázla-aara. ¹⁹ Ma edda una demka am shedekwe keni, dem shedekweka una duksa, edda una an ñelá am shedekwe keni, dem shedekwe hyepka ba názara keni. Duksa yaikke wá, sey ba dāba nāzu a ndahanaa Dadaamiya.

²⁰ Daaci ma ware keni, a tsaatse á ba am tate-aara na ndza a dántaa Dadaamiya am kwa ge se dāba ñane na. ²¹ Daha á Dadaamiya a de beráká am nāvire emtu, geni ká se dāba ñane? Má estuwa, dzameka ire á nāvire mázla-aara, amá máki jerje pute umele geni ká gevge egdza zhele wá, una keni ba shagera ge ekka. ²² Yá

ndahaná adaba uwe dzameka ire, adaba má ura am návire, Yaakadada a dante geni á daba nane, edda-aara gevge ba seke egdza zhele áza Dadaamiya. Ba estuwa ge edda una á kwaraná nane ire-aara am duniya na keni, má a dantaa Dadaamiya geni á daba nane, edda-aara keni gevge náve á Yaisu *Almasiihu. ²³ Dadaamiya á varakurse an duksa yaikke jauje ge ndzeɗa á urimagwe, daaci gawevka náve-aha á emnde d'ekideki. ²⁴ Estuwa egdzar mama-aha-aaruwa, ma ware á kure keni njawinja á ba am tate na ni ndza a d'akurtaa Dadaamiya átekwa na, njawinja ba estuwa á katafke-aara.

Elva a emnde na zlaɓe gareka nika an mukse na a keɗaa zhele-aara

²⁵ Ate elva a gyaale-aha, antara dawale-aha wá, una wallá ya cenaaná áza Yaakadada, wallá uwe, yá vakurte ba sawari-aaruwa. Diyakurdiya geni Yaakadada a magiyaa ngurna, ganevge ura-aara, daaci hyainevhye geni kwá cena názu yá bakurná iya. ²⁶ Adaba kwakyire á wahála na yá zharaná ya na wá, má ura á njá ba estuwa keni mándzaweka, a ba iya. ²⁷ Daaci ekka edda una ká an nika á na zlauzle wá, tatayeka ica nika á na. Amá ekka edda una zlaɓe ngudaŋka nika wá, sleka elva á nika mázla-aara. ²⁸ Ma ká gá mukse keni mándzaweka, ma gyaale keni máki á de gá zhele haypa-ka, amá duksa palle wá, emnde na garega nika na wá, aŋkwa wahála ázetare ma vaatara keni. Daaci yá kátá lyakurse á ba am wahála nanna.

²⁹ Egdzar mama-aha-aaruwa, názu yá bakurná iya wá, náwa zamáne á miya na á de haraaka kwakya mázla-aara. Daaci kure emnde na kwá an ñwasha keni, magawanaamaga duksa ge Dadaamiya ba seke kwa baaka an ñwasha.

³⁰ Kure emnde na kwá am laruwa keni, gawevge ba seke ndza shakurka emtañkire; emnde na tá am geḍa, a zhararzhára higa-aatare ba seke hyefka duksa; emnde a shákwa kazlaña á duniya keni a garevge ba seke baaka duksa-aatare.

³¹ Daaci baḍemme á názena á maga slera á ba an kazlaña á duniya na, fauka ire á kure átekwa, aḍaba duniya na á de zle.

³² Wayanka kwá hyá lyuwa an duksa umele ḍekideki. Edda una gaaka mukse, ñane á fá hyema á ba áte názu á kataná Yaakadada, á kátá maga ba názu á de hayánháyá Yaakadada.

³³ Amá edda una an mukse wá, estuweka, Ñane á shuñnula ba kazlaña á duniya geni á geḍantegeḍa mukse-aara an ñane, ámbera á dzámá slera á Dadaamiya keni. ³⁴ Daaci ñane ire-aara gevge bubuwa. Ba duksa palle ge ñwasha keni. Mukse má gaaka zhele ba ḍekideki, antara una zlaḍe gyaale wá, itare ire-aatare á ba áte namaari á Yaakadada, tá tataya vante ire-aatare, antara ervaunḍe-aatare baḍemme ge Dadaamiya. Amá mukse á zhele wá, ñane á hyá lyuwa á ba an kazlaña á duniya, á kátá á geḍante zhele-aara an ñane. ³⁵ Baḍemme á elva-aha na, yá tsakán ge piyakurte duksa umeleka, yá kátá ba njá á kure, yá kátá kwá maganaamaga názu zlaya, ira kwá vante ire á kure baḍemme ge Yaakadada.

³⁶ Kina wá, mí ndáhá elva á dawale, má tá kátá pákyáva an gyaale na á shebaná ñane. Amá má ervaunđe-aara ndunde gyaale ñanna, diyeddiye geni ba gyaale ñanna keni á de zladá ervaunđe-aara kwakya áte una ñanna, ervaunđe-aara á kátá ba tá ñgudá nika an gyaale, daaci baaka haypa am huđe-aara ðekideki, ba á gá gyaale-aara, a piyaraterteka názu njarantenja am ervaunđe-aatare. ³⁷ Áma máki egdza dawale njantenja am ervaunđe-aara geni á pekyá ge sheba gyaale mazla-aara, baaka sawarí á emnde umele am huđe-aara, a tapanaa ba ñane am vuwa-aara geni á dzegwándzegwa nja estuwa, á ñanaaṅa vuwa-aara, daaci ma gaaka mukse keni a magaa ba shagera. ³⁸ Jirire á elva ñanna wá, edda una gaaga mukse keni a magaa duksa shagera, amá átira ba edda una má gaaka mukse na.

³⁹ Ge mukse á zhele, am sarte na zlaḅe zhele-aara aṅkwa an shifa, an piya ganakini á pakyaava an zhele-aara, á de gá umele, sey má kedaakeda zhele lauktu mukse á gevge egdza zhele; amá keni sey á de gá ba slefatarfe seke ñane. ⁴⁰ Amá áte iya wá, á de shá higa kwakya má á njá an há-aara mázla-aara, arge una á de ga zhele umele na. Iya keni yá tama a binaa ba Sheðekwe á Dadaamiya.

8

Elva a za názu ta icanante ge hele

¹ Kina wá, mí habaza elva a hyuwa na tá icanante ge hele na. A ba kure, baðemme á miya diyamidiya jirire á elva ñanna, una ba jire. Ay

degiya, diya ɲanna á dá ura á dem kuraavire, sey ba wayavire palle una á dá emnde a fetarfe á de katafke. ² Má bánba edda-aara, iya wá, diyandiya duksa mázle-aara, ɲane zlaɓe shanka ɲane enjkale á jirire. ³ Amá edda una aɲkwa á ɗaba Dadaamiya áte waya á ervaunɗe-aara wá, ɲane an diya áza Dadaamiya.

⁴ Ate elva a zá názu tá icanante ge hele wá, kwá kátá yá bakurá uwe? Náwa, baɗemme á miya diyamidiya geni zhera ba hele tá maganá emnde am duniya na, baaka námpire-aara. Diyamidiya zlaɓe ádaliye geni Dadaamiya wá, buweka sey ba palle. ⁵ Gevge wá, duksa-aha na áte samaya, una áte haha, kwakya názu emndimagwaha tá kezlater ugje ba seke dadaamiya. Kwakya duksa-aha na garevge dadaamiya-aha áza emnde umele am duniya. Duksa-aha umele kwakya garevge ba seke Yaakadada-aha arge emnde. ⁶ Amá ázemiya wá, baaka Dadaamiya umele sey ba palle, Eddemiya na duksa baɗemme a nderanaa ba ɲane, shifa á miya, a nderamiya ba ɲane, mi emnde-aara. Yaakadada keni sey ba Yaisu *Almasiihu palle, Dadaamiya ndza a nderaa duksa baɗemme áte erva an ɲane; shamiyánsha shifa kina aɗaba ɲane.

⁷ Amá kure, emnde umele á kure zlaɓe diyarka jirire á elva ɲanna, geni baaka námpire á hele ɗekidɗeki na. Daaci má tá aɲkwa zá názu ta icanante ge hele wá, kertenj tá fetarfe am ervaunɗe-aatare geni itare keni tá á ba am hele ɲanna. Ya ndahanaa aɗaba uwe una, aɗaba emnde ɲanna ndza mbarsembe mága hele ba

estuwa, mele zlaɓe ádaliye keni zlaɓe gyarebka am elva á Dadaamiya. Daaci itare ma ta zu vaatara hyuwa ɲanna keni, tá fetarfe á ba an jirire am ervaunɗe-aatare geni ta magaa duksa shagerka. ⁸ Má ge jirire wá, á badzámiya náza za-ka an Dadaamiya. Ma zamiyuze keni á sagamika, ma zamika keni ɓaaka názu á gula áte miya.

⁹ Ekkure wá, kwá kwaraná kure ire á kure, ge zá názu kwá kataná kure. Amá wá, magaumaga enkale, geni a mbedɗeka edda una zlaɓe gyebka am fetarfire na aɗaba kure. ¹⁰ Amaana: ba seke edda una zlaɓe gyebka am fetarfire na, máki á zhara ka edda una gyakebgye na, ká aɲkwa njá am tate á maga hele, ká ámbera zá duksa á hele, daaci fakanemfa ndzedá am vuwa ge ɲane na zlaɓe gyebka am fetarfire na, ge eptsa á dem hele ka emtu? ¹¹ Daaci diyeddiye ba shagera geni ɲane ɲanna zlaɓe gyebka am fetarfire á eptsa á dem kataliya na wá, aɗaba ba ka na gyakebgye na. Ay degiya egdza emmeɲa ba ge ekka, Yaisu *Almasiihu a yaa shifa-aara aɗaba ɲane. ¹² Má nja á kure ba una wá, kwá aɲkwa maga kelaadire áte egdzar mama-aha á kure na zlaɓe gyarebka am fetarfire na; an una ɲanna, kwá aɲkwa puwaterpuwa á dem dzámá ire. Diyaweddiye geni kwá magaterán ge egdzar mama-aha á kure-ka palle kelaadire ɲanna, amá kwá maganán ge Yaisu Almasiihu. ¹³ Máki watse á mbedá egdza emmerwa aɗaba názu ya zuwa iya á dem huɗe, ambane yá zeka hyuwa ɲanna, geni a vananteka ektápaare ge egdza emmerwa.

9

Slera á slebelá an názu á zlayán ge ñane

¹ Ba iya na kwá aṅkwa zharizhárá na keni wá, ábi yá kwaraná ba iya ire-aaruwa. Emtu ya slebela á Yaisu *Almasiihu-ka emtu? Ndza nanánka Yaisu Almasiihu an ice-aaruwa ṅgayye emtu? Ekkure na náwa gakurevge emnde a fetarfe na keni barka ba slera na ya magannaa ya ge Yaakadada ka emtu? ² Ma hyainefka slebela áza emnde umele keni wá, ázekure wá, hyainefhye. Am njá á kure kina gakurevge palle antara Yaakadada keni á mára ba jawapa ganakini ya slebela á Yaakadada Yaisu Almasiihu, kwa jesaare na keni adaba slera na ya magannaa iya. ³ Yá de baterá ba una ya ge emnde na tá aṅkwa á habaza názu am iya na. ⁴ Adaba slera na ya maganaa ya am dágave á kure na, zlayika ge yá zuze, yá shushe áte kure emtu? ⁵ Emtu ta piyite an piya ge iya ga mukse, geni ma andze njá ja dába kerde an mukse-aaruwa ge mága slera á Dadaamiya, seke una tá aṅkwa á maganá tara Piyer, antara emnde a bela umele, an egdzar mama-aha-ṅara ge Yaakadada na emtu? ⁶ Emtu kwa dzeranjerse ba ñere njainṅe antara Barnabas geni njá gelaná ba ñere ire á ñere emtu?

⁷ Ndza kwa cenáncena ser palle, geni zhel sawji aṅkwa á wavanu ge larde ni á gelaná ba ñane ire-aara? Á ba á jerje sleherda, á maga slera am fe, amá má magaamaga duksa áte fe wá, á feka áte we-aara? Emtu aṅkwa suni na á

piyá walda ni á sheka ufa áte dabba-aha na á piyaná ñane?

⁸ Emtu garáva-aha ñanna ya tsakese ba názena tá anƙwa á slaslaná emndimagwaha emtu? Una, á ba am *tawraita keni mi ndaha ba una. ⁹ Anƙwa an puwa am tawraita á Muusa, a ba ñane: Ngudanaanuka *japa ge we á dalau na anƙwa á maga slera na, á bina. Emtu Dadaamiya a ndahese una á ba áte dalau ba jirire emtu? ¹⁰ Ba jirire, Dadaamiya á tsaka elva-aha ñanna á ba áte miya. Sleherɗa wá, á maga slera-aara an tama. Ba duksa palle ge emnde na tá gyega hiya keni, shagera jipu geni ta fetefa tama áte názu zlaya-aatare ge itare keni. ¹¹ Ay náwa ñere ña se hyanme elva á Dadaamiya am kure ba seke ta hyanme wulfe am fe. Daaci máki ñere ñá lyya ba kazlaña á duniya na am erva á kure ge zuze á ñere, una mándzawe emtu? ¹² Má zlaya á emnde umele ge sha náza zuze-aatare am erva á kure, sakwa ñere emtu? Má áte jirire wá, zlaya á ñere ge ñere keni, amá nja ba palása na ñá anƙwa maganá ñere na, ba ñá farvaunɗeka, ndavañerka ñere geni kwá melañerumele, ñá kuva ba ni a eptsarka emnde na tá se cena labáre á higa, elva á Yaisu *Almasiihu na.

¹³ Diyakurdiya emtu geni emnde na tá maga slera am mashidi, á gelaterá ba názu emnde tá danán ge Dadaamiya á dem mashidi? A ba am mashidi ñanna zlaɓe á daliye: Emnde na tá maga slera á ica dabba keni tá á ba an dza-aatare am hyuwa ñanna? Diyakurka una ñanna emtu? ¹⁴ Náza á emnde a bálá waazu keni ba estuwa. A ba Yaakadada an we-aara: Náza ñá shifa á

emnde bálá elva-aaruwa á segashe á ba am slera-aatare. ¹⁵ Jirire tsa, aley keni iya katanka ya názu yá njá shifa-aaruwa an njane áte una njanna. Ba kina keni, banakuránka una ge kátá duksa ázekure. Una ma yá emtsa keni, ya hayaa ba una njanna, arge una tá kedinaakeda názu yá gedá átekwa na. ¹⁶ Yá shánka zleba adaba yá bálá labáre á higa, elva a Yaisu Almasiihu, una gevge laarire áte iya, má yá báleka, watse laruwa ge iya. ¹⁷ Ma andze ya eksesaa ba iya an ire-aaruwa slera njanna wá, ma yá ndava mbera-aaruwa keni. Amá una estuweka, a fiyaara ba Dadaamiya ge iya. ¹⁸ Ay wá, ázara kena mbera-aaruwa ge iya? Mbera-aaruwa ge iya wá, ba yá balaterá elva á Yaisu Almasiihu ba dey ge emnde, yá lyyieka názu á zlayizláyá am slera-aaruwa.

¹⁹ Iya, yá kwaraná ba iya ire-aaruwa, ya náve á ura-ka. Amá ya ganvaa ba iya ire-aaruwa ba seke ya náve á emnde bademme, geni yá sá emnde ba kwakya áseza Yaisu *Almasiihu deydey á ndzedfa-aaruwa. ²⁰ Diyandiya tsa ganakini yá kwaraná ba iya ire-aaruwa am názena á ndahaná *tawraitá á Muusa, amá má yá am dágave á Yahudiya-aha wá, yá njá áte njá á Yahudiyire, geni a fartaarfe itare keni áte Yaisu Almasiihu. Má yá áza emnde na tá ankwá dfa náde á Yahudiya-aha bademme áte laarire na, iya keni ba yá edfaba antara itare, geni yá gatervege emnde á Yaisu Almasiihu. ²¹ Zlafe adaliye: Má yá am dágave á emnde na diyarka tawraitá á Muusa dfekideki na keni maa, yá ganve ire-aaruwa ba seke itare. Una á bánka ni janaaveje

áte tawraitá á Dadaamiya, una estuweka, adaba fanansaarfe ge una a ndasaa Yaisu Almasiihu na. Amá yá magán ba geni a shanátersha ge d'aba Yaisu. ²² Ba estuwa ñanna zlaɓe ádaliye, má yá am dágave á emnde na zlaɓe gyarebka am fetarfire, iya keni yá ganve ire-aaruwa ba seke itare. Una ma yá am dágave á emnde na nja-aatare estara keni, yá ganve ire-aaruwa ba seke itare, geni yá lyelye emnde umele am itare an jeba á pute-aha ñanna. ²³ Bademme á una ñanna, yá magán ba geni a hyemhya elva á Yaisu Almasiihu am sleɗe bademme, geni iya keni yá de shánsha dza laɗa-aaruwa am huɗe-aara.

²⁴ Diyakurdiya emtu geni má emnde tá anƙwa degeza zhágade geni á de icáná ware ire, emnde kwakya una tá zhagade, amá sey ba emnde na ta ica ire una tá lyiya duksa? Daaci kure keni wawauwáwa ba seke náza-aatare, kwá de shánsha názá á kure keni. ²⁵ Bademme á emnde na má watse tá de zhagade na wá, ma ware-aatare keni á ettsaha, á sala vuwa-aara ba kelaazare geni a mbesmbe vuwa-aara, lauktu á de icaná ñane ire vaci lámare. Bademme a wava-aatare ñanna wá, ba geni tá shánsha zleba á hare palle. Amá miya wá, wawaumiwáwa am slera á Dadaamiya geni mí de shánsha *ɗanƙaula na á zleka ɗekideki na. ²⁶ Adaba una ñanna, iya wá, yá zhagade á ba á de katafke. Zlaɓe adaliye, ya ba seke edda una ni anƙwa á ja ɗeɗekwa na, amá wá, yá jeka á dem kaamba ba dey. ²⁷ Iya ya ba seke sleja ɗeɗekwa, a ba iya na wá, amaana: Yá hereka vuwa-aaruwa ɗekideki, sey ba yá kwarukware vuwa-aaruwa ma vaatara

keni, geni iya edda á balaterán ge emnde vatena, a de velyariseka á degáshe adaba hyainefka.

10

Gawevka emnde a mága hele zlafe ádaliye

¹ Egdzar mama-aha-aaruwa, wayanka kwá viyanaaviya názena ndza a shaa eggye-aha a miya werre am sarte na ndza tá antara Muusa. Dadaamiya ndza a shebatervehe bademme-aatare am kumba am sarte na tá átira zlálá; bademme-aatare, baaka una ndza ebzuka Haye Kyanje na. ² Am zlálá-aatare am kumba, ira degashe-aatare am guwa nanna, ndza ba seke magarateraamaga baptisma geni tá gevge emnde á Muusa á ba an jirire. ³ Itare bademme, ndza baaka una zauka dafa na ndza a vatertaa Dadaamiya á sa am samaya na. ⁴ Baaka una shauka yawe na ndza a vatertaa ba Dadaamiya an hákuma á Shedekwe-aara á segáshe á sawa am palaha na, bademme-aatare ndza sharushe yawe nanna. Palaha na ndza a ngyekwateraa Dadaamiya nanna wá, ba Yaisu *Almasiihu. Nane ndza ankwá antara itare ba kelaazare. ⁵ Aley, nja ba una nanna bademme na, ndza kwakya emnde am dágave-aatare hayáterka Dadaamiya adaba shagerkire á mága-aatare. Adaba una nanna, zateruze duniya á ba am kaamba.

⁶ Daaci bademme á una nanna, á bamiyá ba elva ge miya keni, geni kataumika jeba á hala nanna ta maganaa itare werre na. ⁷ Gawevka emnde a mága hele zlafe ádaliye seke una ndza ta maganaa itare werre, daaci ta puwetehe

am wakita á Dadaamiya geni emnde njarinja á katafke á hele, tá anƙwa ezza, tá ámbera essha, daaci ta tsetehe tá shekela á bina. ⁸ Magauka gwardzire seke una ndza ta maganaa emnde umele-aatare, daaci ta naba matsehe, emnde debu kul buwa ju keye una ta kedaa áte váha palle na. ⁹ Adaliye, tatayaumika gyá hala á Dadaamiya seke una ndza ta maganaa emnde ñanna werre, adaba una ñanna a cebateraahé ge záhe na. ¹⁰ Zlabe ádaliye, magaumika dugune áte Dadaamiya seke una ndza ta maganaa emnde umele-aatare, daaci a naba kedateraahé ge Dadaamiya á kya erva an malika na á belaná á de ceba emnde na.

¹¹ Baɗemme á lámare na ndza a shaa itare na wá, ba ge faterem am vuwa ge emnde umele geni itare wá, a magarmága enƙale. Ta puwete am wakita á Dadaamiya, ge fami magiya ge miya emnde na mi herzhe an kataliya á zamane na. ¹² Daaci faufa hyema ba shagera, sakwa edda una ñane á tapán ba seke ñane wá, tsaatse ba shagera na, sey á fa hyema ba shagera geni a mbedeka. ¹³ Lámare na á badakurá shaitaine an ñane baɗemme na, ndza a fantau vateneƙa. Emnde umele keni ndza ta bashaa ba una ñanna. Dadaamiya wá, ñane dzayye ervaunɗe-aara am názu ndza a ndaase ñane baɗemme. Á de belanaaka deƙideƙi geni á shakursha názu á jauje ge ndzeɗa á kure. Báda á shaitaine wá, á ba anƙwa, amá ma a shakur vaatara lámare ñanna keni, Dadaamiya á de vakurte midalire, á de magakurná ba ñane puta, geni á fertakuraferta an ñane.

14 Adaba una ɲanna egdzar mama-aha-aaruwa, gawanápteka dfekideki ge elva á mága hele. 15 Elva-aaruwa ba una ge kure, wallá kwa egdzara-ka, uweka, lawanaale ba kure elva-aaruwa ɲanna, tara jirire an fida keni. 16 Slawanaasle á ba áte náza sha na mi gan barka ge Dadaamiya argena má mi za dfafa á Yaakadada na. Má mi eksante, mi shuhe na wá, gamiyevka palle antara Yaisu *Almasiihu adaba uzhe-aara na ndza a puwanvaa ɲane na emtu? Adaliye, má mi kezlanve dfafa mi ezza na wá, gamiyevka palle antara Yaisu Almasiihu adaba shifa-aara na ndza a yanaa ɲane na emtu? 17 Dafa wá, ba dɔgwala palle, amá mi kwakya mi zá ba una ɲanna; amaana: am kwakyire á miya ɲanna wá, gamiyevge ba seke ura palle.

18 Zharauzhára áte una tá anƙwa maganá emnde a *Iserayiila: Tá icanante dabba ge Dadaamiya áte tate-aara seke una a kwaratersaa ɲane, daaci emnde na má zaruze hyuwa ɲanna, bademme-aatare garevge emnde á Dadaamiya á ba an jirire. 19 Kwá á ba á cenáncena ndza názu yá anƙwa bakurná iya na? Emtu kwá cenán ba seke hyuwa na tá icanante ge hele keni duksa emtu? Ba hele ɲanna deme, duksa á jirire emtu? 20 Una duksa á jirireka dfekideki. Arge una ɲanna, názu yá bakurná iya wá: Má emnde na zlaɓe dɔabarka Yaisu *Almasiihu ta icataa duksa wá, tá vante ge Dadaamiya-ka, amá tá vaterte ge jini-aha. Adaba una ɲanna, wayanka kwá gev palle antara jini-aha. 21 Una á taa gevka dfekideki, kwá de shá názena ni tá fater ge jini-aha, ádaliye kwá se sha una á katafke á

Yaakadada Yaisu Almasiihu. Zlaɓe ádaliye: Kwá dzegwánka de zá názena tá gyater ge jini-aha, kwá se zá náza á Yaakadada Yaisu Almasiihu keni ba kure. ²² Má gevge ni mi magán estuwa wá, mi kátá elva á Yaakadada, emtu kwa kurken mí januje an ndzedá emtu?

Ma am uwe keni magaumága adaba hairire á emnde umele

²³ A ba emnde umele á kure: Ábi duksa baɗemme gevge ba halál? Una ba jire-aatare. Amá wá, duksa baɗemmeka una watse emtake áte miya. Ta bántsa itare: Ankwa baráma á mága ma uwe keni. Ay degiya, duksa na watse á melamiyuka ɗekideki ge ɗaba Dadaamiya keni ankwá. ²⁴ Ma ware á kure keni magaumága názena ni watse emtake áte emnde umele, zharauka názu watse emtake ba ge kure palle na. ²⁵ Baɗemme á hyuwa-aha na tá ankwá valaná am kwaskwe wá, ma ndza ta icanante ge hele keni ndaveka ka, dzameka ire átekwa ɗekideki, ká naba esshekwa, ká de ezza duksa á ɗa. ²⁶ Adaba a ba wakita á Dadaamiya: Haha, antara názu átekwa baɗemme ba náza á Yaakadada.

²⁷ Ma a ɗahakte vaatara ura á ɗa na zlaɓe fetareka áte Yaisu ge de za náza za am mba-aara keni, má ba eksakaarekse duwa wá, ndaveka, dzameka ire áte náza za ɗanna ɗekideki, ká naba ezza. ²⁸ Amá má a se balaksehe ge ura umele geni hyuwa ɗanna ndza ta icanante ge hele wá, naba yanya, zeka mázla-aara, adaba á de sha shuɗnula edda una a se balaksebale na. ²⁹ Ya ndaaná adaba uwe una: Yá kuva ba názu

watse á de dzamaná ñane na. Ekka wá, yá kuva náza á ña ka mázla-aara.

Bánka zlaɓe: Má ba mbate duksa baɗemme ba halál, ay labára yá zeka aɗaba edda una a se balisebála na?

³⁰ Bánka zlaɓe áɗaliye, a ba ka: Má ba ganarge maduwa ge náza za-aaruwa an zhera á Dadaamiya, labára tá tsakiyaare elva arge názu ya magar maduwa lauktu yá ezza?

³¹ Duksa yaikke na yá bakaná iya wá: ma ka ján vaatara ire an náza za, bi náza essha, ma ká maga ba uwe keni, emmága á ba áte una ni watse emnde baɗemme tá de zleba Dadaamiya aɗaba ekka na. ³² Ma am uwe keni magaumága á ba áte una ni watse kwá de mag-ateránka emtaɗkire ge emnde umele an ñane, ma ge Yahudiya-aha, ma ge emnde a fetarfe, ma ge emnde-ara keni egdzara á nálgaadama baɗemme. ³³ Magaumága á ba áte una yá aɗkwa á maganá iya na. Am názu yá maganá ya baɗemme wá, yá aɗkwa wawa geni a gevge áte shagerire, emnde keni tá de hayánhaya. Yá manka názu watse emtake ba ge iya palle na, amá yá maga názu watse emtake áte emnde baɗemme, geni itare keni a lyarlya shifa-aatare áza Dadaamiya.

11

¹ Dabaudába ba sera-aaruwa, ba seke una iya keni yá aɗkwa aɗaba sera á Yaisu *Almasiihu na.

Fáɗa ire á ñwasha á katafke á Dadaamiya

² Iya yá zleba ba kure, aɗaba danseka am ire á kure am názu kwá maganá kure baɗemme,

kwá aṅkwa maga ba názu ndza ya bakurnaa iya na. ³ Amá náwa názu yá kátá kwá diyeddiye zlaɓe ádaliye: Yaisu *Almasiihu wá, ire ba ɲane arge zala baɗemme, zhele keni ire ba ɲane arge mukse, Dadaamiya ɲane ire arge Yaisu Almasiihu. ⁴ Má zhele á ɲala áza Dadaamiya, bi aṅkwa á mbedateru elva na ndza a shanaa ɲane áza Dadaamiya ge emnde wá, sey á eksevarekse dzakwa emtsaafé. Má magaaka una ɲanna wá, a epsawaa Yaisu Almasiihu na ire arge ɲane na. ⁵ Amá mukse wá, estuweka. Má mukse aṅkwa á ɲala áza Dadaamiya, bi aṅkwa á mbedateru názu a shanaa ɲane áza Dadaamiya ge emnde, an ire dey, ɲane keni aṅkwa á epsawa zhele-aara na ire arge ɲane na. ɲane gevge ba seke mukse na a sehese ire na, una zherwe jipu. ⁶ Ha! Má mukse ɲanna wayaaka fáɗa ire, labára á icanvaareka, bí á sehesehe úgje ɲanna ba ɗekideki? Ay degiya, una duksa zherwe náza enndaaka. Daaci má estuwa, sey mukse á faɗesefafe ire-aara.

⁷ Amá ge zhele wá, má aṅkwa á ɲala áza Dadaamiya wá, á fáɗeka ire. Afaba Dadaamiya a nderaa zhele áte ndera-aara ge ɲane, zhele á mara yaikkire á Dadaamiya. Amá mukse wá, á mara ba yaikkire á zhele. ⁸ Diyamidiya geni Dadaamiya ndza sanseka zhele am vuwa á mukse, amá ndza a sanse ba mukse am vuwa á zhele. ⁹ Zlaɓe ádaliye: Dadaamiya ndza nderaaka zhele afaba mukse, amá ndza a nderaa mukse afaba zhele. ¹⁰ Afaba una ɲanna, sey ba mukse una á faɗa ire-aara, ge marese zherwe na á fáná ɲane áte zhele-aara,

ira adaba malika-aha keni. ¹¹ Amá keni ge njá á miya am elva á Yaakadada Yaisu *Almasiihu wá, ma mukse keni á ba an dárádza-aara ba seke zhele, zhele keni á ba an dárádza-aara, ma ware-aatare keni á hyepka má baaka palle-aatare. ¹² Ba seke una ni Dadaamiya ndza a tedese mukse am vuwa á zhele na wá, kina keni ba mukse una á yá zhele, duksa bademme á maganá ba Dadaamiya slera-aara.

¹³ Lawanaale ba kure an ire á kure má shagera geni mukse á sem jáháva ge njala Dadaamiya an ire dey. ¹⁴ Zhele maa, áte názu mi zharanaa miya á ba am njá á emnde am duniya keni wá, úgje sladde am ire wá, á gev duksa zherwe ge njane. ¹⁵ Amá má mukse a shaa úgje sladde am ire wá, á fanaare ge dárádza. Adaba Dadaamiya ndza a vanta úgje sladde ba ge mukse ba seke lafaya ge sheba ire-aara an njane. ¹⁶ Má ankwá ura á kátá gá jáwe arge elva njanna wá, nává názu yá banná iya ge edda-aara: ma njere, ma aiklaisiya-aha á Yaisu Almasiihu na tá áme keni, nade á miya ba una baaka umele.

Elva a dafa á dzámá Yaakadada

¹⁷ Am názu yá bakurná iya kina na wá, yá galakurka mázla-aara. Adaba am jáháva á kure á katafke á Yaakadada, kwá maga ba mandzawire, arge mága shagerire ge dákurá á de katafke. ¹⁸ Emtsaade wá, ta bantsa: Ba kelaa má jakurammeje á katafke á Dadaamiya wá, sey ba gergere ye á kure. Una ba iya keni kyalma-aara fantaarefe. ¹⁹ Baira deme, shagera ba kwá tegava njanna, geni tá sesse emnde na tá ankwá daba Yaisu *Almasiihu an jirire na.

²⁰ Má kwá jáháva á kure ñanna wá, kwá zá dafa á Yaakadada ka kure ñekideki. ²¹ Ya ndahanaa adaba uwe una, adaba ma ware keni á de berda ba dafa-aara ge ñane, daaci á zuze, á shushe á ba áte hufe-aara haa á weshanante ire, amá emnde umele á waterá ba waya. ²² Má kwá maga ba una, baaka há á kure ge zá dafa á kure ñanna, kwá shá duksa á kure am hufe-aara emtu? Emtu kwá kátá epsawa aiklaisiya á Dadaamiya emtu? Emtu kwá kátá fateraare zherwe ge talága-aha emtu? Kwá kátá yá bakurá uwe kina? Kwa kurken yá galakurgála emtu arge una? Yá galakurka ñekideki.

²³ Náwa duksa na yá kwarakursa iya na wá, iya keni ndza a kwarisaa ba Yaakadada emtsaade. Lauktu tá velateru Yaakadada Yaisu ge kelaade-aha-aara wá, ba vacite ñanna an vayiya, a eksetaa dafa, ²⁴ a slafan we-aara ge Dadaamiya argena, a ba ñane á elvan ge emnde-aara: Una degiya vuwa-aaruwa, yá yanya shifa-aaruwa adaba kure. Kure keni magaumága ba estuwa ganakini kwá dzamidzáma an ñane. ²⁵ Am iga á masane, a eksetaa náza sha keni, a ba ñane: Una wá, namána anwaslire na watse á de ñgudaterá Dadaamiya ge emnde an uzhe-aaruwa. Ma kwa jamme vaatara ge sha jeba á una keni, magaumága ge kwá dzamidzáma an ñane.

²⁶ Elva á Yaakadada ñanna wá, amaana: ma kwa jamme vaatara ge zá dafa ñanna, ira sha náza sha ñanna, kwá anjwa bálá elva a emtsa-aara dem sarte na má de saasa ñane.

²⁷ Adaba una ñanna, ma ware una a zu dafá

á dzámá Yaakadada, a sharhe náza sha-aara an baakire á zherwe, daaci edda-aara gaaga haypa áte Yaakadada antara uzhe-aara. ²⁸ Daaci ma ware keni sey á zlauzle am hábaza názu am ñane emtsaade ba shagera, lauktu á ezza, á essha. ²⁹ Má edda-aara lanaaka ba shagera geni una vuwa á Yaakadada, ma a zuhe, a shuhe keni, a zaare ba shairiya ge ire-aara. ³⁰ Adaba ba una ñanna, emnde á kure kwakya ta lipa-aha, emnde umele keni garevge lipa-aha baaka ndzedaaatare, emnde umele deme emtsaremtsa. ³¹ Amá ma andze mi habazesaa ba miya emtsaade názu am huđe á miya lauktu mi ezza, mi essha wá, daaci Dadaamiya ma andze á zamika an shairiya mázla-aara. ³² Ma Yaakadada Dadaamiya á fá zladá áte miya keni geni duksa umeleka, una ba geni á fámiya am enjkale, lauktu á de ñamika am shairiya mázla-aara seke emnde bademme am duniya.

³³ Adaba una ñanna egdzar mama-aha-aaruwa, má kwá jáháva ge zá dáfá á Yaakadada wá, faufa ervaunde geni a saremsa emnde bademme emtsaade. ³⁴ Má anƙwa ura á taa bashuka waya, sey á zuze duksa am mba-aara emtsaade, geni tedawanteka shairiya áte ire á kure am jáháva á kure. Jugena á elva-aha umele wá, watse yá de palakurnaapálá ma danemda ázekure.

12

Hákuma á mága slera-aha gergere na á vatertá

Shedekwe Cufedde ge emnde

¹ Egdzar mama-aha-aaruwa, kina wá, mí ndáhá elva áte hákuma á mága slera-aha gergere na á vatertá Shedekwe Cufedde ge emnde na. Yá kátá kwá cenevaacena una ba shagera. ² Diyaweddiye geni am sarte na zlaɓe fakurtareka áte Yaakadada Yaisu *Almasiihu wá, ndza á tedakura ba Shaitaine an hákuma-aara á de maga hele, názu wallá á ndáhá elva ka. ³ Adaba una ɲanna, yá kata kwá diyeddiye ba shagera: geni má ba jirire anƙwa Shedekwe á Dadaamiya am ura ɲanna wá, edda-aara á dzegwánka nyanya Yaisu Almasiihu. Zlaɓe ádaliye: ura ba dey, á taa ndaaseka áte Yaisu Almasiihu geni ba ɲane una Yaakadada, sey á banná ba Shedekwe Cufedde ge edda-aara.

⁴ Anƙwa hákuma á maga slera-aha gergere ge emnde, amá á tegaterá ba Shedekwe Cufedde palle. ⁵ Anƙwa slera-aha gergere á fateraare Yaakadada Yaisu Almasiihu ge emnde-aara, amá tá maganán ba ge Yaakadada palle. ⁶ Zlaɓe ádaliye: anƙwa hákuma á mága slera-aha gergere, amá ba Dadaamiya palle una á dá slera-aha ɲanna á de katafke geni a gevge. ⁷ Shedekwe Cufedde anƙwa máraɓa am kure an jeba á hákuma-aha ɲanna, geni kwá magateránmaga námpire ge emnde an ɲane. ⁸ Ge ura umele, Shedekwe Cufedde á vante hákuma á pálá sera á elva-aha an ilmu na a vantaa Dadaamiya. Ge ura umele, Shedekwe ɲanna á vante hákuma á dise elva shagera ge enndaha. ⁹ Ge ura umele, ba Shedekwe ɲanna, á vante hákuma á fetarfire áte duksa geni a de gevge ba jirire. Ge ura umele,

á vante hákuma á mba ura áte lapikere. ¹⁰ Ba Shedekwe ɲanna palle, ge ura umele á vante hákuma á mága najipu-aha; ge ura umele, á vante slera á nabiyire; ge ura umele á vante hákuma á lanaale-aara, tara una jini, an tara Shedekwe Cudedɗe keni; ge ura umele á vante hakuma á ndáhá elva aɲwaslire na ni ba ɲane keni diyaaka na; ba Shedekwe ɲanna, á vante hákuma ge ura umele geni á palanaapálá elva ɲanna. ¹¹ Baɗemme á hákuma-aha ɲanna, ba slera á Shedekwe Cudedɗe palle, á tegaterá ge emnde-aara baɗemme áte una á kataná ɲane.

Ubiya-aha kwakya am vuwa palle

¹² Diyamidiya geni vuwa á urimagwe wá, ɲane palle ba ɲane, amá ubiya-aha kwakya, antara duksa-aha gergere aɲkwa an dzagwa am ɲane. Ma kwakya ubiya-aha, an duksa-aha ɲanna am ɲane keni, zhera-aara ge ɲane wá, ba vuwa palle. Vuwa á Yaisu *Almasiihu keni ba estuwa ɲanna, amaana: aiklaisiya-aara. ¹³ Miya baɗemme á miya, ma Yahudiya-aha, ma emnde a jeba umele, ma náve-aha, ma emnde na tá kwará ire-aatare na, baɗemme am sarte na magaramiyaamaga baptisma, mi naba jamme, gamiyevge ba palle. Una keni á ba an hákuma á Shedekwe Cudedɗe ɲanna palle, ba Shedekwe ɲanna palle una aɲkwa am ma ware á miya keni baɗemme. ¹⁴ Vuwa á urimagwe gevka ba ubiya palle, amá ubiya-aha, an dzágwa á duksa-aha umele kwakya aɲkwa am ɲane. ¹⁵ Má bánba sera: Iya wá, yá máslaaveka an vuwa, aɗaba ganevka erva, una á ba magaavemage emtu, geni

á njinja yiyye áte vuwa? ¹⁶ Má bánba hyema: Iya keni yá máslaaveka an vuwa, adaba ganevka ice, una ba jirire geni ñane gevka tate umele áte vuwa emtu? ¹⁷ Ma andze vuwa á urimagwe ðeme surumme ni ba ice palle wá, ma andze á cenáná an uwe kena duksa? Bi ma andze Dadaamiya a nderaa ba hyema palle geni ura wá, ma andze á sáná an uwe kena duksa? ¹⁸ Amá Dadaamiya nderaaka ura estuwa. Dadaamiya a ndera vuwa á urimagwe wá, an duksa-aha umele gergere bademme an dzagwa am ñane, áte una á kataná ñane. ¹⁹ Ma andze Dadaamiya a nderaa ba duksa palle am njá á duksa-aha na mí zharaná miya áte vuwa á urimagwe na wá, una ma andze vuweka ðekidfe. ²⁰ Amá gevka estuwa; anƙwa ubiya-aha gergere, antara duksa-aha gergere an dzagwa am vuwa á urimagwe, bademme á duksa-aha ñanna, ta jema ba vuwa palle.

²¹ Daaci má estuwa, ice á taa banánka ge erva: baaka wedere-aaruwa an ka. Ire keni á dzegwánka baterán ge sera-aha: baaka wedere-aaruwa an kure. ²² Baira ba egdzar duksa-aha na tá am vuwa á miya, miya mí fateruka hyema geni baaka payða-aatare na wá, tá ñáná ba itare shifa á miya. ²³ Zlafe adaliye, duksa-aha umele keni tá anƙwa áte vuwa á urimagwe, amá miya mí feka dárádza áte itare, ira duksa-aha umele keni mí maga zherwe-aara jipu, mí njá á ba tsufatertsufa, tá ñáná ba itare zlafe adaliye shifa á urimagwe. ²⁴ Duksa-aha na áte vuwa á ura bademme, duksa na shagera ge ezzhárá-aara, á famika am zherwe, baaka wedere á miya ge

etsufa-aara na keni, a nderanaa Dadaamiya ba estuwa áte una ndza a katanaa ñane. Daaci a naba fa dárádza áte duksa na á fá ura am zherwe na kwakya-aara. ²⁵ Dadaamiya a naba jemaa duksa-aha ñanna am vuwa á urimagwe, wayaaka an tegava-aatare ðekidëki, á kátá tá maga duksa baðemme átirpalle.

²⁶ Má aṅkwa zlaða áte duksa palle am vuwa á ura, vuwa baðemme á tápá ba zlaða ñanna. Má ubiya palle shansha geða, baðemme á vuwa á eggeða.

²⁷ Daaci ba ekkure na una kwa vuwa á Yaisu *Almasiihu. Ma ware á kure keni ñane duksa palle áte vuwa ñanna. ²⁸ Náwa Dadaamiya á bazláter estuwa emnde am aiklasiya-aara: Zunṅwe wá, a dzerese emnde a belá á Yaisu Almasiihu. Ge buwire, a dzerese emnde a mága nabiyyire. Ge keyire, a dzerese emnde a kwaratersa duksa ge emnde. Am iga á emnde ñanna, a dzerese emnde a mága najipu-aha, antara emnde na a vaterte hákuma á mba emnde na ta lapika-aha na. Ge emnde umele, a vaterte hákuma á melateru ge emnde. Ge emnde umele a vaterte hákuma á gev emnde a sawari á aiklasiya. Ge emnde umele zlaðe áðaliye, a vaterte hákuma á ndáhá elva-aha gergere na ni ba itare keni diyarka na.

²⁹ Am názu kwa cenanaa kure kina na wá, emnde baðemme ta ba emnde a belá emtu? Emtu emnde baðemme tá dzegwándzegwa mága nabiyyire emtu? Emtu baðemme tá dzegwándzegwa mága malumire, bi mága najipu-aha gergere emtu? ³⁰ Emtu, itare wá,

bademme ma ware-aatare keni an hákuma á mba ura áte lapikere emtu? Emtu bademme-aatare tá an hákuma á ndáhá elva-aha gergere na ni ba itare keni tá cenánka na emtu? Emtu má ndarsendáhe elva áŋwaslire ŋanna wá, ma ware keni á naba palanaapálá emtu? ³¹ Názu yá bakurná iya wá, kataukátá ba hákuma-aha na ni an námpire jipu na. Amá wá, yá marakuránmárá ba iya ŋanna zlaŋe ádaliye uŋŋule á duksa umele na ni jauje ge duksa bademme na.

13

Shá wayavire jauje ge duksa bademme

¹ Ma yá an hákuma á ndaha elva an we á emnde na tá am duniya na bademme, antara ba elva á malika-aha keni, máki baaka tsawe ba wáyávire am iya wá, nara-aaruwa á gev ba dey. Baira yá gev ba seke hula á ganŋa, an nalgaita na baaka sera-aara dƣekidƣeki, á waterwa am hyema ge emnde na. ² Una ma Dadaamiya a vite hákuma á nabiyire keni, ma diyandiya duksa bademme, ma ya shaa hákuma á dise nasherire-aha bademme, ma ya shaa fetarfire na yá naba tsantetse wa an ŋane keni, má baaka wáyáva am iya wá, hyanevka ba názara keni. ³ Zlaŋe ádaliye, ma ya tegaterse nalmane-aaruwa bademme ge talágá-aha, ma ya yaa shifa-aaruwa bademme geni a zariyuze an kárá adaba fetarfire keni, má yirye mága wáyávire wá, una-aha ŋanna bademme na á magiyánka námpire dƣekidƣeki.

⁴ Wáyávire wá, á vante farvaunđe ge ura; wáyávire, á vante maggwire ge ura. Slewayava á feka ice am duksa á ura; wáyávire á feka ura am kurávire, á feka ura am gálá ire keni. ⁵ Wáyávire á maŋka baakire á zherwe. Ura aŋkwa wáyáva-aara wá, á magaterteka emtaŋkire ge emnde, á iceka ervaunđe watsewatse, á maŋka dugune áte ura. ⁶ Ura an wáyáva, á higarka ge mandzawire, amá á higa arge jirire. ⁷ Wáyávire, á faná ervaunđe ge duksa bademme. Wáyávire á vante fetarfire á jirire ge ura, á vante tama ge ura; ura aŋkwa wayava-aara á ŋanaaŋa ervaunđe-aara am duksa bademme.

⁸ Wáyávire wá, dem ba ge dekideki á njá ba kela-aara. Amá tara hákuma á mága nabiyire, antara hákuma á ndaha elva na ni ba edda-aara keni á cenánka na, ira hákuma á dise ndáhá elva shagera na, bademme watse á zlauzle. ⁹ Adaba kina wá, ma diya á miya, ma nabiyire á miya keni, bademme zlaŋe mí maga ba kyalma-aha-aara. ¹⁰ Amá má de samsa una hyebhye bademme na, daaci una kyalma kyalma na bademme watse á zlauzle.

¹¹ Am sarte na zlaŋe ndza ya ba seke egdzere wá, ma yá ndáhá elva, ma yá dzámá duksa, ma fa hyema-aaruwa áte duksa keni, ndza ya magán ba seke egdzere ŋanna. Amá am sarte na ganevge ura wá, yanánya hala á egdzarire mázla-aara. ¹² Am kinire na wá, ma uwe keni zlaŋe mí zhárá ba kyalma-aha-aara ba seke má tá zhárá duksa am kweteram na á zhareka shagera na. Amá vacite umele wá, watse mí de nanna duksa ŋanna ba tsefaŋŋe átuwa á ice á

miya. Kina wá, ma uwe keni ya dise ba kyalma-aara, amá vacite ñanna wá, yá de diyeddiye bademme, ba seke una a diyisaa Dadaamiya na.

¹³ Amá aɲkwa duksa-aha keye wá, ñaaka zle-aatare ñekideki: Ba fetarfire, táma, ira wáyávire. Amá yaikke-aatare wá, ba wáyávire.

14

Hákuma á mága nabiyyire an hákuma á ndáha elva áɲwaslire

¹ Wavauwáva ba shagera geni kwá gevge emnde a wáyáva, kataukatá hákuma-aha na á vatertaa Shedekwe á Dadaamiya ge emnde na keni. Kwakya-aara wá, kataukatá ba hákuma á mága nabiyyire. ² Má ura á ndáhá elva áɲwaslire na ni ba ñane keni á cenánka na wá, á baterán ge emndimagwaha ka, á banán ba ge Dadaamiya an ire-aara, adaba ba Dadaamiya palle una á cenáncena. Adaba edda una ñanna keni á ndaha ba nasherire na ni a vantaa Dadaamiya an hákuma á Shedekwe Cufedde.

³ Amá edda una ni á maga nabiyyire wá, ñane á baterán ba ge emndimagwaha geni á magaterá námpire, á faterem ndzedá am vuwa, ira á ekhyaterá ervaunđe zlaɓe ádaliye. ⁴ Daaci edda una an hákuma á ndáhá elva áɲwaslire na ni ba ñane keni á cenánka na wá, ñane á vante ndzedá ba ge ire-aara palle am fetarfire-aara. Amá edda una ni á maga nabiyyire wá, ñane á faterem ndzedá am vuwa ge emnde á Dadaamiya bademme am fetarfire-aatare. ⁵ Ate iya wá, ma bademme á kure shakuránsha

hákuma á ndáha elva na ni ba kure ñanna keni kwá cenánka na keni ba shagera. Amá una yá kataná ya kwakya-aara wá, ma ware á kure keni á shánsha hákuma á mága slera á nabiyire. Adaba átire ba nabiyire, arge edda una á tsáká elva áñwaslire na ni ba ñane ñanna keni á cenánka na. Sey máki jesarje edda una á pálá elva ñanna, lauktu á maganá námpire ge aiklaisiya keni.

⁶ Egdzar mama-aha-aaruwa, kina má danemda á dezekure, daaci yá de tsakakurse elva-aha, amá cenakuránka ðekideki, ázara námpire-aaruwa ge kure? Shagera-aara wá, yá tsakakurse názu ndza a binaa Dadaamiya, bi yá vakurte diya-aha umele am elva á Dadaamiya, bi yá bakurá sera á elva á nabiyire-aaruwa, bi yá kwarakurse elva á Dadaamiya an elva na kwá cenánca. Má baaka una ñanna wá, daaci námpire-aaruwa ge kure keni ba baaka.

⁷ Kina ba seke kazlaña á gá gwesa, seke tara nalgaita, an gadzavera, diyamidiya tsa geni tá ndaaka elva. Amá má edda á fertá nalgaita ñanna á ferteka an unñule-aara, má edda gadzavera keni á jeka an unñule-aara, má tá weshusha ba dey, á cenáná ware sera-aara, antara emtakire á gwesa? ⁸ Ge ðáhá emnde á dem wáva keni ba estuwa. Má edda á fertá derkwákwá fertaaka náza wáva ba shagera á dem hyema á emnde, ware edda una á de ñgwáðáva ge dem wáva ba ðekideki keni? ⁹ Ba duksa palle ge kure keni, má kwá ndáhá elva áñwaslire na ni ba kure ñanna keni kwá cenánka na, tá de cenákurá estara kena

emnde? Daaci elva á kure kwá ndahaná á dem kaamba ba dey. ¹⁰ Ankwa elva-aha gergere kwakya am duniya, amá bademme á elva-aha, emnde a ndáhá-aara tá cenáncena maana-aha-aara bademme. ¹¹ Amá má gevge ni ura á biya elva, amá yá cenánka elva-aara dekideki wá, edda-aara gevge ba seke wayve ázerwa, iya keni ya ba seke wayve ázeñara.

¹² Daaci ba seke una ni wayakurwáyá jipu an hákuma-aha na ni á vatertá Shedekwe Cudedde ge emnde á Dadaamiya na wá, kwakya-aara kataukátá ba hákuma á mága duksa na ni watse á de melaterumele ge emnde á Dadaamiya am fetarfire-aatare na.

¹³ Adaba una ñanna, edda una an hákuma á ndáhá elva áñwaslire na ni ba ñane ñanna keni á cenánka na wá, sey á ñala Dadaamiya zlahe ádaliye geni á vante hákuma á eppálá-aara keni.

¹⁴ Má yá ankwa maga maduwa an elva áñwaslire na ni ba iya keni yá cenánka na, am ervaunde-aaruwa yá maga ba maduwa á jirire, amá am enkale-aaruwa, baaka duksa dekideki. ¹⁵ Ay yá maganá estara? Sey yá ñala hákuma á eppálá-aara keni áza Dadaamiya. Estuwa, yá maga maduwa an elva na tá cenáncená emnde na, yá emmága an elva á ekse-aaruwa keni. Ba estuwa ge belá láhe keni, yá beláná an elva na tá cenáncená emnde na, yá ebbela an elva á ekse-aaruwa keni. ¹⁶ Má baaka una, edda una ñane zlahe ba seke wayve na keni, má diyaaka sera á názu ká tsakaná ka am slafawe á ña á deza Dadaamiya, adaba elva ñanna á cenánka ñane á de ñuta estara kena *Aamin? ¹⁷ Ekka wá, ma ká

aŋkwa slafaná we á ña á ba an unñule-aara ge Dadaamiya keni, á melanuka ðekideki ge edda una á cenánka na.

¹⁸ Yá aŋkwa slafaná we-aaruwa jipu ge Dadaamiya, aɗaba janakuruuje ge kure baɗemme an ndaha elva áŋwaslire na ni ba iya keni diyanka na. ¹⁹ Amá má am jáháva á emnde a fetarfe wá, ya hayaa ba ndaase elva buwa, bi keye na tá cenáncena emnde na, geni yá kwaraterse duksa an ñane, arge elva-aha na tá cenánka na. Ma ya ndaase elva debu keni á hyefka ba názara keni.

²⁰ Egdzar mama-aha-aaruwa, gawevka ba seke egdzara mesheshe an eŋkale. Má áte elva a haypa wá, gawevge ba seke egdzara mesheshe na zlaɓe ta dzegwánka mága haypa na. Amá an eŋkale wá, gawevge ba seke zala na hyairefhye na. ²¹ Aŋkwa puwartepuwa am wakita á Dadaamiya, a ba ñane:

Yá de bateránba elva-aaruwa ge emnde-aaruwa an elva na tá cenánka itare na; watse yá ðela wayve-aha, tá de bateraa elva-aaruwa an elva na diyarka itare ðekideki na, aley tá de fisaareka á bina.

²² Daaci estuwa, bateraa elva na tá cenánka emnde ðekideki na ge emnde, una ñanna gevge nalaama ge emnde na kwalarevkwále ge fetaare áte Yaisu *Almasiihu na, geni itare garevka emnde á Dadaamiya, una ge emnde a fetarfe ka. Amá hákuma á mága nabiyyire wá, una keni nalaama ge emnde na fartarfe na, geni Dadaamiya aŋkwa antara itare, una ta ðaaka emnde umele amkwa.

²³ Máki seke jarammeje emnde á Dadaamiya am tate palle, daaci itare bademme farantaufe ge tsaka elva-aha na ni diyarka ðekidëki, má daremda emnde na zlaɓe gyairebka am fetarfire, antara emnde na zlaɓe fartaareka ðekidëki na, tá bánka emnde na tá an shaitaine emtu? ²⁴ Amá má am jáháva-aatare ni, bademme tá maga ba nabiyire, tá bálá waazu na ta cenanaa itare áza Dadaamiya am dágave-aatare an elva a ekse-aatare wá, una ma ta demaa ba emnde na zlaɓe gyarebka am fetarfire, an emnde na zlaɓe fartareka ðekidëki na keni, ba vacite ɲanna itare keni tá diyeddiye haypa-aatare aɗaba názu ta cenanaa an hyema-aatare am jáháva ɲanna, tá diyeddiye am erwaunde-aatare geni ɲáteraana shairiya á Dadaamiya. ²⁵ Daaci nasherire na am erwaunde-aatare bademme á semsa á sem enkale-aatare, tá demda am sera á Dadaamiya, tá de ganaaga ire-aatare á dem áhá, tá de bánba ganakini ba jirire áɲkwa Dadaamiya antara emnde na.

Duksa bademme magaumága á ba an enkale an unɲule-aara

²⁶ Daaci yá bakurá uwe kina egdzar mama-aha-aaruwa? Názu yá bakurná iya wá: Ma kwa jamme vaatara ge cena elva á Dadaamiya keni, edda una má aɲkwa láhe ázeɲara na ba á belá láhe. Iyau, edda una ni aɲkwa elva á Dadaamiya ázeɲara ge kwaraterkwára ge emnde na, ba á emmága. Ba estuwa ge edda una an názu ndza a maransaa Dadaamiya am wahayu keni. Adaliye: Edda una an hákuma á ndáhá elva áɲwaslire na ni ba ɲane keni á cenánka na, ɲane keni ba

á ebbálá, lauktu á dabaná edda una an hákuma á pálá elva áṅwaslire ṅanna. Baɗemme á názu kwá de maganá kure wá, magaumága á ba áte una ni watse á de melaterumele ge emnde á Dadaamiya am fetarfire-aatare na. ²⁷ Náza á emnde a ndáhá elva-aha na á cenánka ura na wá, sey tá ndahaná ba emnde buwa, kwakya-aara a jauka am emnde keye. Zlabe ádaliye keni, sey tá ndahaná an palpale, á máslá sey á jesarje edda una ni an hákuma á pálá elva-aha-aatare ṅanna ge eptsepta-aara. ²⁸ Má gevge ni jesarka edda una an hákuma á palatera elva-aha ṅanna ge emnde wá, a kabalarka vuwa-aatare á katafke á jáháva, amá a ndarndáhá á ba am ervaunɗe-aatare antara Dadaamiya. ²⁹ Ba duksa palle ge emnde na tá an hákuma á mága nabiyire keni. Itare keni sey tá ndahaná ba emnde buwa, bi keye, emnde umele tá cenaná á ba an hyema, daaci tá lanaale tara elva ṅanna jirire, an fida keni. ³⁰ Má gevge ni á ba am sarte ṅanna, Dadaamiya a naba maranse duksa ge ura umele am dágave-aatare wá, daaci edda una an elva áte we na, sey ba á farvaunɗe emtsaafé, á ndasendaha edda una a shaa nabiyire na. ³¹ Ábi baɗemme á kure, ma ware keni kwá de ndasendáhe nabiyire á kure? Amá ndaundaha á ba an palpale, geni kwá cenevaacena duksa am huɗe-aara, lauktu kwá de shá ndzeɗa an ṅane am fetarfire á kure. ³² Emnde na Sheɗekwe Cufedɗe a vaterte hákuma á mága nabiyire wá, tá naba kwarukwáre ervaunɗe-aatare keni, ma tá kátá ɗuɗe keni tá naba ɗuɗe.

³³ Ya ndanaa aɗaba uwe una, aɗaba

Dadaamiya wayaaka wesha elva am dágave á miya, ñane a wayamiyante ba hairire.

Ba seke una ni am aiklaisiya-aha á Dadaamiya baɗemme, ma áme keni ³⁴ ñwasha a ɗaranuɗe ge we-aatare ba tseriye am jáháva á emnde a fetarfe na wá, daaci ñwasha-aha á kure keni a ɗabardába á ba áte una ñanna. An piya ge ñwasha, geni tá ndaha elva am jáháva. Sey ñwasha tá ganaaga ire-aatare ba seke una a ndahesa wakita á Dadaamiya na. ³⁵ Má anƙwa názu cenaránka tá kátá enndáva keni maa, a de ndavarndáva áza zála-aha-aatare am mbá. Adaba zherwe geni mukse á ndáhá elva am jáháva á aiklaisiya.

³⁶ Emtu kwa kurken elva á Dadaamiya ñanna a fantau ázekure zuññwe emtu? Emtu kwa kurken ba kure palle una kwa emnde a cena elva á Dadaamiya ñanna emtu? ³⁷ Má edda-aara á slaslán ba seke ñane wá, anƙwa hákuma á nabiyire ázeɗara, ñane shánsha hákuma áza Shedefke Cufedɗe wá, sey á diyeddiye edda-aara geni názu yá bakurná iya na keni, a banerna ba Yaakadada. ³⁸ Má edda-aara cenaaka, ma ware keni a cenaranvaareka ge edda-aara áte jirire.

³⁹ Daaci egɗzar mama-aha-aaruwa, názu yá bakurná iya kina wá, yá bakurá ba kataukátá mága nabiyire, kataukátá an ervaunɗe á kure palle. Amá emnde na tá an hakuma á ndáha elva-aha na tá cenánka emnde, ba itare keni tá cenánka na keni, piyawaterdeka, a naba ndarndáha. ⁴⁰ Amá, duksa baɗemme, maga-

umága á ba an enkale, magaumága an unḡule-aara.

15

*Elva a tse á Yaisu *Almasiihu am faya*

¹ Egdzar mama-aha-aaruwa, kina wá, yá kátá yekuranteyeha labáre á higa, elva á Yaisu *Almasiihu na ndza ya balakurse iya na. Kure keni ndza lyakurvaalya, ḡakurnaḡa an ervaunḡe á kure palle. ² Ba seke una ndza ya ndakurndáhá ḡanna wá, á de lyakurá ba elva ḡanna má kezlakuranveka fetarfire á kure. Amá máki magakurka áte una ḡanna wá, fetarfire á kure na á de gev ba dey.

³ Emtsaade wá, náwa iya, názu ndza ya cenaana iya, ya bakuránba bademme, geni *Almasiihu yanya shifa-aara, a lyamivaare haypa ge miya ba seke una ta puwete am wakita á Dadaamiya werre na. ⁴ Ta hedehe emtsa-aara, amá am hare ge keyire a naba tsetehe am faya ba seke una a ndahanaa wakita á Dadaamiya na. ⁵ Am iga a tse-aara am faya ḡanna maa, a de marese ire-aara áza Piyer, lauktu a de maraterse ire antara pukura-aha umele ta kelaawa ju buwa. ⁶ Am iga a una ḡanna, a maraterse ire-aara ge emnde-aara tá tsaaka an emnde deremke ilyebe una ta naanaa átirpalle, baira emnde umele-aatare kwakya zlaḡe tá á ba an shifa-aatare, ma emnde umele zlauzle hairire-aatare keni. ⁷ Am iga a una ḡanna zlaḡe ádaliye a marese ire-aara áza Yakuba, lauktu a maraterse ire-aara tá antara emnde a bela-aara umele bademme.

⁸ Am iga-aatare bademme, a marise ire-aara ge iya keni. Iya vacite ñanna, ndza ya ba seke egdze na ta yese áñwaslire, amá zlaɓe hyafka sarte-aara na. ⁹ Iya wá, ya cekwa ba iya am dágave á emnde a bela á *Almasiihu. Baira ba ganakini tá dahiya an slebela ñanna keni, hyanevka ya dekideki, adaba ndza ya shateru zlaɗa kwakya ge emnde a dába Almasiihu. ¹⁰ Amá Dadaamiya, am maggwire-aara, a naba magiya ñgurna wá, kwaye ñane ganevge ura estuwa vatena. Ñgurna na a maginaa ñane na gavka dey, baira janateruje ge emnde a bela umele bademme an mága slera-aara. Ate jirire wá, una ndzedá-aaruka, a maginaa ba Dadaamiya ñgurna ge emmága-aara. ¹¹ Daaci labáre á higa, elva a Yaisu Almasiihu na, ma ya ndakursaa iya, ma ta ndakursaa emnde a bela umele keni, baaka gergerire-aara, ñá balakurá ba duksa palle na kwa fetaara kure am ervaunɗe á kure na.

Elva a tse á emnde am faya

¹² Náwa yá anƙwa balaná am waazu-aaruwa, ganakini Yaisu *Almasiihu wá, tsetse am faya. Ay a sawa estara zlaɓe ni, tá bántsa emnde umele am dágave á kure: tá taa tseteka emnde a faya, geni tá gev an shifa adaliye na? ¹³ Ma andze jirire geni tá taa tseteka emnde a faya wá, daaci amaana Almasiihu keni ba tseteka am faya. ¹⁴ Ay degiya, ma andze ba jirire geni tseteka Almasiihu am faya wá, daaci waazu á ñere na keni ma andze ñá maganá á dem kaamba ba dey. Fetarfire á kure áte Yaisu Almasiihu na

keni ma andze ba dey. ¹⁵ Ma andze estuwa wá, ñere keni ma andze ña emnde a mága fida áte Dadaamiya. Adaba ña bántsa ñere: Dadaamiya tsantetse Yaisu Almasiihu am faya. Daaci ma andze baaka tse á emnde am faya wá, Dadaamiya ndza tsanteka ñane Yaisu Almasiihu keni am faya. ¹⁶ Ma andze jirire geni tá de tseteka emnde na zlauzle hairire-aatare na am faya wá, Dadaamiya ndza tsanteka ñane Almasiihu keni am faya deki. ¹⁷ Ay ma andze ni tsateka Almasiihu am faya wá, fetarfire á kure áte ñane na keni ma andze á de gev ba dey, sem ba kina keni ma zlaɓe ba njá á kure am haypa-aha á kure. ¹⁸ Zlaɓe á daliye: Emnde na ndza ta matsa am zhera á Yaisu Almasiihu na keni, ma ba baaka elva-aatare, ma ba kedarekeɗa ba deki. ¹⁹ Má fetarfire á miya na ni ba ge melamiyumele am duniya na zlauzle wá, una wá, emnde bademme ma andze tá zamivaare ba ge miya kwakya-aara.

²⁰ Amá una ba jirire geni Almasiihu tsetetse am faya, ñane slezuññwe á emnde a faya ge tseta am faya, gev an shifa. ²¹ Amaana: ba seke una ndza a sanaa ba urimagwe emtsa á sem duniya na wá, ge tseta am faya keni á fantuwa ba ura zlaɓe á daliye. ²² Ba seke una ni egdzara á Naadama tá emtsa ba seke ñane na wá, emnde na tá an kwa daba Yaisu Almasiihu na keni bademme tá de tsetse am faya ba seke ñane. ²³ Amá tseta am faya ñanna wá, ma ura-ara keni á ba an sarte-aara. Almasiihu wá, ñane slezuññwe. Adaliye tá de tsa emnde na ta fetaare áte ñane vacite na má de eptsaptsa ñane. ²⁴ Am iga a una

ɲanna maa, Yaisu Almasiihu á de kedateraakeda jini-aha, antara male-aha-aatare bademme, ira emnde na tá an hákuma am duniya na keni bademme, lauktu á de yaná sleksire ge Eddeɲara Dadaamiya zlaɓe ádaliye. Zlakta á duniya watse á ba áte una ɲanna mázla-aara. ²⁵ Adába sey Almasiihu á njá an hákuma emtsaade, dem sarte na ni má Dadaamiya gatervege kelaade-aha-aara tate á puwa sera-aara. ²⁶ Kelaade na ni watse á de jáná Dadaamiya am iga a kelaade-aha umele bademme na wá, ɲane emtsa na á ceba emnde na. ²⁷ A ba wakita á Dadaamiya wá: Dadaamiya a ganve duksa bademme á dem sera á Egdza-aara. Ma a ndaase estuwa Dadaamiya am wakita-aara keni, una á bánka ganakini edda a jema duksa á dem sera á Egdza-aara na keni aɲkwa am duksa-aha ɲanna. ²⁸ Má duksa bademme demda am sera á Egdza-aara maa, daaci ɲane ire-aara keni á de dáná á dem sera á Eddeɲara na ndza a vante hákuma na. Estuwa, duksa bademme á de kwaraná ba Dadaamiya.

²⁹ Aɲkwa elva umele wá, slaslauminaaslasle elva ɲanna ba shagera: tá aɲkwa emnde umele tá liyaterá baptisma ge emnde na emtsaremtsa na. Ma andze ba jirire geni baaka tse á emnde am faya wá, tá lyaterva ge uwe baptisma á emnde ɲanna mázla-aara? Ay má estuwa wá, názu tá maganá itare na watse ba dey kwaye kele? ³⁰ Ba ɲere ire á ɲere keni, labára ɲa naba eksarhe zlaɗa áte ire á ɲere estuwa, náwa ba kelaazare njá njá á ba an emtsa am slerpa na? ³¹ Egdzar mama-aha-aaruwa, iya wá, ba kelaa

wera á ekse, njá-aaruwa ge iya wá, ba watse yá vatevaáhe an shifa, ba watse yá haretehárehe an shifa. Una yá ndakur ba jirire duksa ɲanna ba estuwa. A gedítaa ba njá á kure kina gakurevge emnde á Yaakadada á miya Yaisu *Almasiihu na. ³² Wáwa yaikke na yá aɲkwa maganá iya am Aifaisus áhuna, ba seke yá aɲkwa slakala an dabba-aha á kaamba na ni, ma andze baaka tse á emnde am faya una, watse yá de shá uwe kena am wáwa-aaruwa ɲanna? Una ma andze estuwa wá, ma andze jire á naraje na a ba ɲane: zaumiyuze, shaumiyushe ba vatena, adaba mákuralla názá á mika na.

³³ Degiya keɓawanaaka ire á kure ba dey, adaba mbapse an ura ɲuɗi wá, á badza eɲkale á ura shagera. ³⁴ Magauka jeba á baakire á eɲkale ɲanna! Magauka haypa degiya! Ya ndanaa adaba uwe una: Adaba tá aɲkwa emnde na zlaɓe diyarka Dadaamiya na am kure. Yá bakurá una geni ma andze á wakursewe ba zherwe.

Elva a vuwa á emnde má tsaretse am faya

³⁵ Ámbane aɲkwa ura á enndáwa geni watse tá tse estara emnde am faya, bi watse á de gevá estara vuwa-aatare? ³⁶ Ekka edda una ká ndava jeba á ndáwa ɲanna wá, yá baká ba ka uce! Diyaɲka wulfe á duksa emtu? Má ka nanna sesse duksa na ndza ka jemaa am haha wá, ba diyakdiya ganakini una ndza ka janaa ka na lebaaleba. ³⁷ Wulfe na ká de janá ka á dem haha na keni, una ma hiya, ma wulfe á uwe keni, ekka ká de ja ba ice á duksa ɲanna á dem

haha, ká de ja duksa ɲanna surumme an waleka. ³⁸ Daaci á de maganá ba Dadaamiya slera-aara, ma ge wulfe á uwe keni á vante nderáva-aara ba gergere antara nderáva á wulfe-aha umele, áte una a katanaa ɲane.

³⁹ Zhera ba názu an shifa am vuwa, hyuwa-aha-aatare gergere bademme. Hyuwa á vuwa á urimagwe keni ba giraara, hyuwa á dabba keni ba giraara, hyuwa á yiye keni ba giraara, náza á kelfe keni ba giraara. ⁴⁰ Ankwa kazlaɲa áte samaya, áte haha keni ankwá duksa-aha, amá wulwulire á názu áte samaya keni ba giraara, zariyire á názu áte haha keni ba giraara. ⁴¹ Wulwulire á vaciya, ɲane ba giraara. Wulwulire á tere keni ba giraara, náza á terlyakwa keni ba giraara, ba wulwulire á terlyakwa-aha keni ba gergere bademme.

⁴² Vací tse á emnde am faya keni watse ba estuwa. Jeba á vuwa ɲanna, watse ba giraara tsekemme. Má heɗereheɗa ura wá, á de ba leɓa. Amá vuwa na á de vanta Dadaamiya ge tse an ɲane á sa am faya na wá, á keɗeka mázla-aara. ⁴³ Má tá ankwá heɗa ura wá, vacite ɲanna, zlauzle payɗa á edda-aara, gevge shagerka am ice á emnde. Amá am sarte na má de tsetetse am faya wá, hákuma-aara keni á de gev umele, an zariyire keni watse ba ka heɗu we.

⁴⁴ Zlabe á daliye: Má tá heɗa ura wá, ta heɗaa ba vuwa na á shekwaaka leɓa na, amá má á de tse edda-aara am faya wá, Dadaamiya á de vante vuwa á samayire. Má diyamidiya ganakini ankwá vuwa a nja am duniya na wá, daaci diyaumiyeddiye keni geni vuwa a de nja am

samaya keni watse anƙwa ba jirire. ⁴⁵ Adaba anƙwa an puwa am wakita á Dadaamiya, a ba ɲane: Dadaamiya ndza fem shifa am Naadama ura zuɲɲwe, amá Naadama na á de sawa am iga-aara na, amaana: *Almasiihu, ɲane Shedekwe á Dadaamiya, á de vatertá ɲane shifa na á zleka na ge emnde. ⁴⁶ Kina am zuɲɲwire na wá, emnde tá nánka vuwa a de nja am samaya, amá tá zhárá ba vuwa na á shekwaaka leba na emtsaade, lauktu watse tá de ná vuwa á samayire. ⁴⁷ Urimagwe zuɲɲwe wá, Dadaamiya ndza a nderanaa an haha, ɲane ura á duniya, amá ura buwire na ndza a sawa am iga-aara na wá, ɲane ura á samaya. ⁴⁸ Daaci emnde bádemme am duniya na, ta de eksa ba edda una ɲane ura duniya na. Emnde na watse tá de njá am samaya keni, watse tá eksa ba ura samaya. ⁴⁹ Kina wá, zlaɓe mí ba seke edda una ɲane ura duniya na emtsaade, amá vacite umele, watse mí de gev seke ura samaya.

⁵⁰ Egdzar mama-aha-aaruwa, náwa názu yá kátá bakurná iya: Urimagwe á taa demka á dem zlanna á Dadaamiya an vuwa na mí zharaná miya kina. Vuwa na watse á de leba na, á taa másláveka an una baaka keɗa-aara ɗekideki na.

⁵¹ Náwa yá anƙwa sakuranse nasherire umele: Baɗemme á miya ka una watse mí emtsa. Amá wá, baɗemme á miya watse á de eptsaptepsa vuwa-aha á miya. ⁵² Vacitu má de fertaranteferta derma á halavuwa á duniya, ba seke ndaha á miya na, ba tara hedanu ge ice, antara werura-aara, kerten á eptsaptepsa vuwa-aha á miya baɗemme. Má fertaranteferta derma ɲanna

wá, emnde na ndza zlauzle hairire-aatare na baɗemme tá de tsetse an vuwa na baaka leba-aara ɗekideki na. Miya emnde na zlaɓe má an shifa keni vuwa-aha á miya á de eptsaptepts ba estuwa. ⁵³ Amaana: Vuwa á miya na náwa ɗane á se máki emtsamimetsa na wá, sey á gevge vuwa na baaka se-aara na emtsaɗe, lauktu á de njá náza ba ge ɗekideki. ⁵⁴ Daaci vuwa á miya na má emtsamtsa ura á sepe na wá, má eptsaptepts estuwa wá, názu ndza ta puwete am wakita á Dadaamiya na gevge mázla-aara. Aɗaba a bántsa wakita á Dadaamiya:

Garega midalire arge emtsa, keɗaranaakeda ba ɗekideki.

⁵⁵ A ba ɗane zlaɓe ádaliye:

Ekka emtsa, áma upa á ɗa na ká ceɓa emnde an ɗane na? Áma ndzedá á ɗa kina? Zlauzle kwa hákuma á ɗa vatena.

⁵⁶ Amá kina wá, haypa-aha á emnde aɗkwa ɗuɗanse huɗe ba ge emtsa emtsaɗe, lauktu á de ceɓaná ɗane emnde. Haypa keni á ɗuɗansa ba *tawraitá huɗe, lauktu ɗane á de magaterá emtaɗkire ge emnde na. ⁵⁷ Amá bawamiyánba ususe ge Dadaamiya, aɗaba midalire na a vami-taa ɗane arge emtsa keni na. A vamite áte erva an Yaakadada Yaisu *Almasiihu.

⁵⁸ Daaci aɗaba ba una ɗanna egdzar mama-aha-aaruwa, kwa emnde-aaruwa keni ba kure, ma vaatara keni njawinja ba dzanɗzane, tsawaatse ba shagera, dzalauka ɗekideki, yawánka maganaa slera ge Yaakadada an ervaunɗe á kure palle. Diyakurdiya, slera

na kwá aṅkwa maganá kure ge Yaakadada na wá, slera á nampire ba ṅane.

16

Elva a jáhá sadake ge melateru ge aiklaisiya-aha am Urusaliima

¹ Kina wá, yá aṅkwa kwarakurse elva a jáhá sadake ge melateru ge emnde á Dadaamiya am Urusaliima. Ekkure keni magaumága á ba áte una ndza ya kwaraterse ge aiklaisiya-aha am Galatiya na. ² Elva ṅanna wá, amaana ba kelaa má samsa vaci laade wá, ma ware á kure keni sey á sansese shungu áte názena ndza a shanaa ṅane, daaci á fá una ṅanna an ire-aara, watse á melateru ge emnde á Dadaamiya an ṅane. Magaumága una ṅanna, ufauka sey sarte á duwa-aaruwa emtsaade á dezekure. ³ Má danemda ya á dezekure wá, kwá de dzeratersá ba kure emnde a dá sadake á kure ṅanna á dem Urusaliima. Daaci iya maa, yá de vaterte nalmesheri am erva ge emnde a dándaaara. ⁴ Máki mi nanna zlááva á elva ṅanna ni, shagera yá duwa ba iya an ire-aaruwa maa, daaci tá de puwisá emnde ṅanna á dem Urusaliima ge da shula ṅanna.

Ngwádáva á Paul ge dem slera á Dadaamiya

⁵ Kina wá, zlaabe yá dem Makiduniya emtsaade, lauktu watse yá dezekure. Adaba yá de kya ba larde ṅanna, lauktu yá daada á dezekure. ⁶ Máki danemda á dezekure wá, bi watse yá de shekwaashekwa ba cekwaanṅudí, bi watse yá de zlanazle sarte á lailaidfire bademme

ázekure. Daaci má watse hyephye sarte a zlála-aaruwa ázekure wá, kwá de meliyumele am shula-aaruwa ge dem tate na watse yá detekwa na bademme. ⁷ Wayanka yá de gá ba hare cekwa na má danemda ázekure. Má wayetewáya Dadaamiya wá, yá kátá de shekwaashekwa ba shagera ázekure. ⁸ Amá kina wá, yá kátá nja am Aifaisus áhuna emtsaade, dem sarte á munjri á *Pantaikausta. ⁹ Adaba Dadaamiya a weritaa baráma á slera yaikke áhuna, slera nanna keni slera á námpire zlafe adaliye. Diyandiya tsa ganakini kelaade-aha-aaruwa keni tá á ba ndaaka.

¹⁰ Má dámda Timaute ádezekure, lyauvalya am dágave á kure, a njeka an lyawa am dágave á kure, adaba nane keni sleslera á Yaakadada ba seke iya. ¹¹ Epsawauka dekideki. Baira deme, melawanumele ba shagera geni á maga shula-aara á ba an higa, melawanumele geni a se beribera. Náwa iya, an emnde a fetarfe na tá áhuna, bademme njá ufa ba sarte a sa-aara.

¹² Amá náza á egdza emmemiya Apaulaus wá, ser kwakya yá nalaná á ba an njálá, geni a darduwa antara emnde a fetarfe umele ge de tsakurartse, amá zlafe eksarka ire-aara emtsaade dekideki. Má watse eksarekse ire-aara lauktu watse á duwa.

Ga use á Paul antara názu am halavuwa á elva-aha

¹³ Ma vaatara keni puwawanaaka vuwa á kure, tsawátse ba dzañdzañe am elva á Dadaamiya, gazlauka dekideki, gawevge ba seke zála na

gyarebgye na. ¹⁴ Ma kwá maga ba uwe keni magaumága á ba an wáyáva.

¹⁵ Egdzar mama-aha-aaruwa, ábi kure diyakurdiya Aitiyain antara emnde a há-aara bademme? Diyakurdiya geni ta emnde zunṅwe ba itare am larde á Akaya ge dába Yaisu *Almasiihu? Itare ta vante ire-aatare ge mágá slera á Dadaamiya am dágave á emnde-aara. Daaci egdzar mama-aha-aaruwa, názu yá kataná iya ázekure wá: ¹⁶ Táslawa á kure, cenaucena názu tá bakurná jeba á emnde ṅanna, fawatersaarefe ge itare, antara ge emnde na tá aṅkwa á maga slera ṅanna antara itare na bademme. ¹⁷ Yá higa jipu áte sawa á tara Aitiyain, antara Faurtunatus, ira Akaikus na. Adaba am sarte na saremsa ásezerwa na, a naba ekhyehe ge ervaunḡe-aaruwa wá, ba seke ya ná ba kure. ¹⁸ Se ekhyarinakhya ervaunḡe ba lailaidḡe, ba seke una ndza ta ekhyakuraa ge kure na. Diyawatersediye ba shagera jeba á emnde ṅanna, geni itare ṅanna wá, hyairebhye geni kwá fá zherwe áte itare.

¹⁹ Aiklaisiya-aha na tá am larde á Aziya bademme tá aṅkwa gakur use-aatare. Tara Akila, tá antara Piriskila, ira emnde a fetarfe na tá jáháva am mba-aatare bademme, tá aṅkwa gakur use-aatare kwakya, adaba njá á kure antara itare na gakurevge ba palle am sera á Yaakadada. ²⁰ Bademme á emnde á Yaisu *Almasiihu na tá áhuna, tá aṅkwa gakur use-aatare. Gawga use-aha á ṅere am dágave á kure bademme, áte wáyáva á egdzar mama.

²¹ Náwa una wá, yá aṅkwa puwetá ba iya

an erva-aaruwa mázla-aara: Iya Paul keni yá anƙwa á gaku use-aaruwa.

²² Má ura yanaaya Yaakadada, sey á nyainyainvenyainya Dadaamiya edda-aara. «Maranata», amaana: Yaakadada á miya, sawa!

²³ Yaakadada á miya Yaisu *Almasiihu a magakurnaamaga ngurna. ²⁴ Wáyáva-aaruwa bademme, yá wayakurá an nane, ekkure emnde na gamiyevge palle am sera á Yaisu Almasiihu na.

Wakita á Dadaamiya
La Bible en wandala

copyright © 1999 Wycliffe Bible Translators, Inc.

Language: (Wandala)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 21 Feb 2024 from source
files dated 29 Jan 2022

dec75dd5-4784-5059-aa00-668d508a6b0d